

JEHOVA-JIRE ³

 Ke a u leboha, Moena Borders.

Le ka lula fatše. Ke sa tsoa kenela kopano feela le Moena Harrel, molulasetulo oa kopano, le ho fumana hore ke moromuo, 'me re batla re e-na le lintho tse tšoanang. Joale o khutlela Gold Coast, Afrika. 'Me ke ikemiselitse ho fihla mono monongoaha. Re ne re leka ho kopanya lethoana mabapi le ho etela Gold Coast ka mor'a ho khutla Afrika Boroa.

² Ke hona moo re neng re tšoere, seo ke se nahananang, e le e 'ngoe ea likopano tse kholohali, mehleng ea ka, e ne e le Afrika Boroa, mohla re boneng batala ba aparang likobo ba likete tse mashome a mararo ba amohela Kreste ka lekhetlo. Amen. Ba ne ba ba kōpile ho pshatla liseto tsa bona fatše, hore ba hlile ba tiile. 'Me ba pshatla liseto tsa bona, ea ka ho nyoloha sefefo sa lerole, 'me ba amohela Kreste e le Mopholosi oa bona, kopanong e le 'ngoe. Ba bile ba ba sala morao mono, ka hona ba—ba ba fumana.

³ Empa memo e kholohali ea aletare eo ke e hopolang, eo Morena a re neileng eona, e ne e le ka hare... e ne e le koana India, teng re batlile re fumana likete tse makholo a mahlano kopanong e le 'ngoe. 'Me ke hona moo re—ha rea khona ho lekanya feela; bohole boo u neng u ka bona teng feela, e ne e le hohle feela. 'Me bohole ba amohetse Kreste e le Mopholosi, empa ho se letho ho ba sala morao. Kahoo ka hona, ehlide, e—e MaSikh a ile a nka ba bona, MaJain a nka ba bona, le joalo-joalo. Kea kholoa bongata ba bona bo ile ba khutlela morao, ka ho bona ntho eo Morena a e entseng le ho e hlahisa mono.

⁴ Bosebeletsi ba ka boo Morena a mphileng bona, mona Amerika ha bo sebetse haholo, ke batho ba Pentekosta feela. Boholo ba likereke tsa Amerika ke likereke tse bohlalefi bo phahameng, 'me li lumela tumeloana. 'Me ba itulela mono feela, u ke ke ua ba tlosa ho eona.

⁵ Empa ha u nka motala 'me u leka ho 'molella lethoana ka tumeloana, ha a tsebe le hore letsoho le letona le le letšehali ke lefe. Ho mo fa pampitšana ho mo thusa ka'ng? O tlameha ho *bona* ho hong. Ke moo e reng ha e bona, a kholisehileng. Le ho bona ngaka ea hae ea moloi e ema e phephetsa hoo, le ho bona Moea o Halalelang o e qhala hona mono. Yaa. Ebe seo—seo se a e bontša, hore Molimo ke mang, ebe ke phetho.

'Me ke thabile haholo ho kopana le Moena Harrel! Ke ne ke... Re ne re bua ka batala ba Afrika. O ne a bua ka ho tšehetsa e 'ngoe ea Moena T. L. Osborn.

⁶ Bongata le tseba Moena Osborn, kea kholoa. Oh, ke eo mohlanka ea khabane oa Kreste, Moena Osborn. Ke e mong oa

metsoalle ea ka ea hlooho ea khomo. Ruri ke hlompha Moena Osborn ka botebo pelong ea ka, moromuo a moholo hakaalo. Ho ea . . . Ke kholoa a entse ho fetisang masimong a boromuo a ho feta mang lefatšeng kajeno, eo ke mo tsebang, ke—ke Moena Osborn. Ke moshanyana ea mosa haholo, ea lokileng, 'me ruri ke rata Moena le Khaitseli Osborn.

⁷ Ho thoe 'Mè Arganbright o teng ka kopanong bosius bona. Na u ipatela 'na, 'Mè Arganbright? Ruri ke ananela tholoana ea hau e ntle. 'Me ha ho makatse ha e le mofumatsana ea mosa hakana, o tsoa karolong ena ea naha mona. Ha a phetse ho bua ka Grass Valley. Ba bakae ba tsebang Mongh. le Mof. Arganbright, tikolohong ea Grass Valley? Be, ke bottle. U hokae, 'Mè Arganbright? Ke qetetse khale ho u bona, u ile oa thella. . . Ke eo moo a leng teng. E. Ho hlohonolofatsoe pelo ea hae. Lelapa la hae ke lehae la ka la bobeli, mosali ea babatsehang hantle mona ho tsoa Grass Valley. 'Me esale a jere moroalo bakeng sa batho ba habo. 'Me 'Mè Arganbright, haeba bona e le bosiu ba hau ba pele mona, Ke ne ke tsoetse morung ke rapela kajeno ha u ne u etela mohatsa'ka le bao. 'Me ke masoabi ha ke ne ke le sieo ho u bona, le ho kopana le motsoalle oa hau.

⁸ Empa ke tla re ke bone ho etsahala ntho hara batho ba hen mona eo ke esong ho e bone motseng ofe oa Amerika nqa efe. Ke bone Bakreste ba itemoha hoba ba fositse, nqa Lentsoe la Molimo, le ho ema 'me ba kopa mohau. E. Ho 'na ekare tsoselotso e ka ropoha ka mona. Ho ka babatseha. Leha ke rerile hakana lefatše ka bophara, 'me haholo-holo Amerika, ha ke eso bone pele, lihlopha tsa Bakreste, ka nako ha Lentsoe le theoloa, ho bontša Lentsoe, ba ne ba ema 'me ba itse (pakile) ba fositse. Eseng hoo feela, empa le bareri 'moho le bona. Joale, ke botšephei boo. Ke rata seo.

⁹ Khaitseli Arganbright, erekaha ba u emisitse, ke tlil'o hlabisa mohatsa ka lihlong. Ke motho ea boi ka ho fetisisa lefatšeng. Empa o lutse mona bosius bona. Moratua, ke lumela u tla iphetseta ka ho etsa sena, empa ke tlil'o kopa mohatsa ka ho ema. Mosali ea mosa ka ho fetisisa lefatšeng lohle, ho 'na. [Phutheho e opa liatla—Mohl.]

¹⁰ Ngoanana oa ka, morali oa ka, morali oa ka e moholo, Rebekah. Joale, moratua, ke a tseba u tlabolsoe ke letsatsi, empa ke batla u eme, leha ho le joalo. Ho lokile, Rebekah. Eo ke morali oa ka, Rebekah. [Phutheho e opa liatla—Mohl.] Kea leboha. Kea leboha.

¹¹ Moena Jewel Rose, ba mo tsebang ba bakae? Bosius bo bong o ne a biletse mohatsa ka sethaleng moo ke leng teng, hoba e qale. A batla a akheha. O a mo qoba hohle moo a ka mo bonang teng. O sutha tseleng ea hae, hoba o tšaba hore o tla mo biletso sefalen hape.

¹² Ka mo bolella, “Bosiung bo bong ke tla u emisa hore u re buelle nakoana.”

¹³ A re, “Hlophisa nkho ea metsi, hobane ke ttil’o akheha.”

¹⁴ Ke motho ea ratehang haholo, mohatsa ka. Haeba tlota efe e lokela lelapa la Branham, e ke e lebisoe ho eena. Ke eena ea kileng a ema lipakeng tsa ka le sechaba. ’Me lintho tsohle tse entsoeng hantle, o li entse.

¹⁵ Ke tšepa mohlankana e mong le e mong mona, ha a nyala, a tla fumana mosali, ’me le tla phela ka thabo joaloka mohatsa ka le ’na lilemo tsena tse mashome a mabeli a metso e ’meli re nyalane.

¹⁶ “Ea fumaneng mosali, o fumane ntho e molemo.” Joalokaha Solomone a boletse, “Mosali ea khabane ke lehakoe moqhakeng oa monna. Ea khopo ke metsi maling a hae.” ’Me mali a hae ke bophelo ba hae. Kahoo, ea khopo ke ntho e mpe ho feta eo a ka e fumanang. ’Me ea lokileng ke ntho e molemo ka ho fetisisa eo a ka e tholang, ka ntle ho pholoho. Efela holane Molimo o ka neha monna ntho efe e molemo ho feta mosali, O ka be o mo file eona, hoba Molimo o fa bana ba Oona lintho tse molemo. ’Me O mo file mosali, ’me ke lebohela seo.

¹⁷ Le ho bona basali, ha ke ntse ke khethula bosiu bo bong, ka Lengolo mabapi le moaparo oa basali bana ba Pentekosta, mokhoa oa meriri ea bona, le ho ea joalo. U re, “Seo ha se etse phapang ea letho.” Ehlide se a etsa!

¹⁸ Ke batla ho le botsa taba. Moena Harrel o teng mona, moromuoa.

¹⁹ Durban, Afrika Boroa, teng ho ne ho lutse basali mono ba hlobotse joalokaha ba ne ba kena lefatšeng; ho se mohla ba tenneng le khareng ea liaparo, ke lethoana feela, e batla e etsa ’nè-, sefahana sa li-inchi tse tšeletseng ka pel’ a bona. ’Me ba eme moo ba le feela kamoo ba ka khonang feela, le ho ema holim’ a mobu ka mor’ a mohlolo o moholo ona o hlahileng kalaneng. ’Me har’ a sehlopha seo, ho batla ho le likete tse leshome tsa Mahamedane (ka lekhetlo) ba amohetseng Kreste kopanong eona eo. ’Me hape ka mono . . . Basali bana, ba eme le banna bana, ba amohetse Kreste.

²⁰ ’Me Moena Bosworth a re, “Moena Branham, ke a kholoa u lokela ho mema hape. Kea kholoa ba ne ba bolela ‘pholiso’ ea ’mele.”

²¹ Ka re, ehlide, litoloko tse fapaneng tse leshome le metso e mehlano. Ua tseba, ho nka . . . U tlameha ho ngola seo u se buileng, ka nako ha ba . . . U re, “Jesu Kreste, Mora oa Molimo, o ttile ho pholosa baetsalibe.” ’Me enoa o tla tloha “blu, blu, blu, blu,” le enoa a tlohe “nic, nic, nic, nic,” hoo ke “Jesu Kreste, Mora oa Molimo.”

²² Ua tseba, ke—ke ne ke tloaetse ho utloa batho ba bua ka lipuo, 'me ka nahana, "Khele, e ke ke ea loka." Empa Bibele e boletse, "Ha ho molumo o sa boleleng letho." Ha ho letho. Ha ke ne ke utloa seo, ba bang ba bona ba tjolietsa se sa linonyana, ba bang ba tsetsela se sa likokonyana, le ntho e 'ngoe le e 'ngoe. Empa e bolela ho hong ho bona, eona, molumo ka mong o ne o bolela se seng.

²³ 'Me eitseha ha e feta hape, 'me ka re, "Be, joale ba tsebang hantle hore hoo ha se 'pholiso' ea 'mele, ke ho amohela Kreste joaloka Mopholosi, le Leholimo leo ho uoang ho lona, le lumela ho Mora oa Molimo, ho Mo amohela e le Mopholosi oa lona, pshatlelang liseto tsa lona fatše!" 'Me ba li lahlela fatše. 'Me ka re, "Hantle mono joale, phahamisetsang matsoho a lona ho Molimo oo, le Mo rorise. O tla le neha Moea o Halalelang!"

²⁴ 'Me ea re ho sa engoe mobung oo, ka bona basali ba neng ba hlobotse; 'me hang ha Kreste a ba hlahela, ba tloha nqalong eo ba phuthile matsoho a bona. 'Me eitseha le ba bona hape, ke ha ba apere liaparo.

²⁵ Joale, haeba Kreste a ka etsa hore mohetene (ea feela) a elelloe hore o fositse, ka ho hlobola, athe basali ba ipolela e le Bakreste 'me selemo ka seng ba eketsa ho hlobola, ha ke e utloisise. Phoso e teng kae-kae.

²⁶ Mohetene ea tala, ea emeng mono feela, a tsoetsoe lefatšeng lena 'me a eso tsebe hoba o feela, ha a tsebe hoba o feela. Empa ha Kreste a fihla ka pel'a sefahleho sa hae, o a elelloa hore o feela, ebile o leka ho ikoahela ka bokhoni ba hae, ho phutha matsoho a hae le ho tloha. Matsatsi a mabeli kapa a mararo hamorao, u tla mo fumana hape, a apere.

²⁷ Joale phoso e teng kae-kae, 'me ke tiile hore ha e ho Kreste. Oh, ke nahana hore Lentsoe le phethahetse!

²⁸ Ke rata leeto la Abrahama feela. Lona ha le joalo? [Phutheho e re, "Amen."—Mohl.] Ke likalika ho lona halelele, ke a tsepa hore ke tla fihla ho *Jehova-Jire* bosiung bona. Ke nkile sehlooho, masiu a mararo kapa a mane a fetileng, 'me ha ke eso fihle ho sona.

²⁹ Empa selemo se seng lapeng nkile ka nka sehlooho, ke rera ka Jobo. Be, ka batla ke qeta selemo Bukeng ea Jobo, Sontaha se seng le se seng le Laboraro, ka Jobo. 'Me qetellong ka mo nyolla ho fihlela a lutse holima thotobolo. Ka mo lulisa mono liveke tse tharo kapa tse 'nè. 'Me e mong—khaitseli e mong ea ratehang ea sebete se lekaneng sa ho 'ngolla, a re, "Moena Branham, u tla tlosa Jobo neng thotobolong le ka mohla?"

³⁰ Be, ke a kholoa le ipotsa hore ke tla nyolla Abrahama neng le ka mohla ho bona *Jehova-Jire*.

³¹ Empa ke ne ke tšoere ntlha. Abrahama . . . Kapa, Jobo o ne a lutse moo thotobolong, Elihu a ntse a bua: Molimo o tse o leka

mohalaleli. Ho e hlahisa eohle, ho fihlela moo nka e hlabang bohlabetsana, ho lokisa ntho eohle. Eaba Morena o theoha ka setsokotsane sena, 'me mahalima a qala a tsekema le lialuma tsa rora. 'Me Moea oa Molimo oa theohela holima moporofeta, a ema ka maoto a hae, ho re, "Ke a tseba Molopolli oa ka u a phela;" shebang "Molopolli." "'Me matsatsing a ho qetela O tla ema holima lefatše. 'Me leha liboko tsa letlalo li sentse 'mele ona, empa ke tla bona Molimo ke le nameng ea ka; Eo ke tla 'Mona ka bona, mahlo a ka a tla talima, e seng a e mong." Oh, thuto e kakang mono! Hoe nkhokhothela ka hare, hoa nka nako ho tsitsisa batho bohole maemong, Moea o le hantle feela, u ntano e khokothela. 'Me eaba aletare e fotse 'me e tletse batho, ba bakang.

³² Ha u mpa feela u etelloa pele ke Moea, nka nako ea hau ho fihlela u kene setsing. Ha u sa etse joalo, u tla thunyetsa holimo haholo kapa u thunye ka bophara haholo, kapa ntho e 'ngoe. Tloong re otla botsekeng, Bibebe! Ke a lumela Molimo o batla ha re otla botsekeng. Moea o Halalelang o ile oa otla botsekeng ka baapostola, kapa ba ne ba eme botsekeng le Moea o Halalelang, ke rialo. 'Me ke a lumela re ka etsa joalo, ka lona Lentsoe le tšoanang. Le otlide tekele! 'Me haeba le otlide khetlo le leng, setsing se shoetseng, le ka otla hape! Empa u tlameha ho ema botsekeng! Etsa bonneta ba hore phefumoloho ea hau, ho hula ha hau, ntho e 'ngoe le e 'ngoe e lokile feela. Ke thunya litekele; ke a tseba ke eng, ho hlophisa papali, le sethunya se tlang ho seteloa botsekeng.

³³ Khetlo le leng ke khutliselitse 'motlolo oa mashosupa-hlano ho K'hamphani ea Winchester, tsatsi le leng. 'Me ke sa khone ho se otlica ha re re kaholima tharo... kapa kotara ea inchi, boholeng ba lijarete tse mashome a mahlano. 'Me K'hamphani ea Winchester ea se khutlisetsa ho 'na, ho re, "Reverende Branham, sethunya seo se etselitsoe feela ho—ho thunya lethala la litholoana tse hlano, ho inchi lijareteng tse mashopeli-hlano." Joale eo e ne e le k'hamphani e se teileng. Ke tseba ntho e fapaneng. Nkile ka totomela, moleng, ka nepo, lipekere tse robong ka tatelano, lijareteng tse mashome a mahlano, ka sona. Ka tseba hoba se ne se chehiloe botsekeng. Eaba ha ke phetse ho se hena-hena, le ho se hena-hena, ka ba ka se khutlisa hape.

³⁴ Joale, ho a tšoana le ka Lentsoe la Molimo. Lintho tseo baapostola bao ba li entseng, lintho tseo Kreste a li tšepisitseng, re tlameha ho ema botsekeng ka Lentsoe, ka Moea. Haeba le khonne khetlo le leng, le tla e etsa hape, hoba Ke Molimo. 'Me Molimo ke Lentsoe, 'me A ke ke a hloleha.

³⁵ Haeba sethunya se tsitsitse, se batla se lokotseha ka mokhoa ona sephakeng, se hlephile hanyenyane kapa se tiisitsoe haholo, ntho efe e se tlamang, u ka imetsa sethunya ka monoana oa hau, 'me (se thunya ka phetheho) boima ba monoana oa hau bo ka faposa mocha. U tlameha ho beha tsohle ka phetheho.

³⁶ U tlameha ho sebetsa joalo Bokresteng, ho etsa hore Lentsoe, ho le bonahatsa le ho sebetsa hantle, uena 'moho le Lentsoe le Molimo, e tlameha ho phethehala, 'me ke moo e tla lula botsekeng. E loketse joalo! Ka baka leo, therong, u lokela ho utloa Moea hantle feela, e ntoba botsekeng; e tla tloha, e tla totometsa tekele.

³⁷ Ebe moo batho ba lutseng ka mathoko, khafetsa batho ba re, "Moena Branham, ha ke utloele ka likopano tsa hau."

³⁸ Ha ke na liphororo tse kang tsa baena ba bang. Ba na le limakasine, ba—ba na le seea-le-moea, thelebishene. Ke feta feela le ho leka ho emela Morena Jesu. Batho ba a e bona, ba e lumela, ba fola. Molimo oa e tseba, ke phetho se hlokoang. Le a bona? Rona ha re, ha re a . . . Ho ke ke ha hlola ho ngoloa nalane ea letho. Le se ke la tšoenyeha ka seo. Nako ea ho ngola nalane e ke ke ea eba teng. Ke lumela hore Jesu o a tla. Hoo, ke a e lumela. 'Me ke batla ho phela kajeno eka hoja A ka tla kajeno kapa hosane. Ha se likolo tse kholo tsa litonana, le joalo-joalo. Re etsang lintho tseo, re ntano rera ka ho tla ha Jesu? Khele, liketso tsa rona li paka khahlano le rona. Ke hantle. Jesu o a tla, a re beng, re hlophisetse kereke hoo! Ha re itokiseng. Oh, kamoo ke Mo ratang!

³⁹ Ha re inamiseng lihloho tsa rona joale lentsoeng la thapelo. Oh, kamoo ke ratang ho bona batho ha ba inamisa lihloho tsa bona ka hlompho. Joale ha re khutseng nakoana, 'me re ithute. Joale re batla ho nka nako ea rona. Hosane ke Sontaha, sabbatha, letsatsi la sabatha ea Bakreste. 'Me ha ke batle ha le fihla sekolong sa Sontaha morao ho nako, leha koana re sa batle ho potlaka ka lintho tsena.

⁴⁰ Nahana joale, "Morena, na takatso ea ka e ka pelong ea ka bosiusng bona e khemisana le thato ea Hau?" Haeba e le joalo, joale u nahane ka eona. Ka hona haeba u nahana ka eona, takatso ea hau, 'me u e hlahloba ka lenaneo la Molimo, haeba bonahala e lokile nqa lenaneo la Molimo, joale ke batla hore u phahamisetse letsoho la hau ho Molimo, le ho re, "Molimo, nkhopole, sena ke seo ke se hlokang." Nahana ka thata ruri. Molimo a u hlohonolofatse. Ke bottle. Morena a u hlohonolofatse. Ke hantle. Lula feela u phahamisitse letsoho la hau. O bona tsohle. O tseba lintho tsohle. Ke hantle. Molimo a u hlohonolofatse. Amen. Morena a hlohonolofatse. Ke hantle. Lula u hopotse feela, u phahamise letsoho. Joale ke shebile letsoho ka leng ha le nyoloha. Ho lokile. Ke bottle.

⁴¹ Ntate ea Leholimong, joale re a tla, re atamela hape ka Lebitso le bokhoni-bohle la Morena Jesu, ho nyolohela Teroneng ea Mohau. Joalokaha seroki se boletse, "Ntumelle Teroneng ea Mohau, ke khatholohe hamonate." 'Me, Molimo, lipelo tsa bona li imetsoe ke ho hong. 'Me joale, teroneng ea Mohau, ba fumane

khatholohlo eo Molimo o ba fang eona, Ngaka e kholo, le tumelo bakeng sa seo ba se hlokang.

⁴² Ke phahamisitse matsoho a ka bobeli. Ke na le litlhoko. Nkhopole, Morena.

⁴³ Hopola batho bana bohle ba mona ba emetsoeng ke lisakatuku tsena. Oh, ho kene mapaki ka baka la lintho tsena. Tlhompho. Ho phatlalla le maralla ana a lehlabathe mona, kae-kae, bommè ba kulang, bontate, masea a manyenyane, batho ba kokelong, ntate oa khale oa sefou ea lutseng motšeо phaposing e nyenyane ka molangoana o mosoeu letsohong la hae, o emetse ho khutla ha lisakatuku tsena. Molimo, hauhela. Aba sena, Morena, mang eo li beoang holima hae, sera se lahleheloe ke matla a sona le bonatla ba sona, 'me ba tlohe 'me ba fole. E 'ngoe mona e ngotsoe, "mofetše." Liabolose eo a ba lokolle, Morena. Moea o Halalelang, etlereha Molimo o nyarela ka Mali a Mora oa Oona ka Sebele ea shoetseng morero oona, tefetso e kholo e ba lekane bosiusing bona, le tumelo e phalle holim'a bona ka ho khaphatseha, 'me bona, kapa, ka bongata, ba tle ba amohele pholiso ea bona. Aba sena, Morena.

⁴⁴ Hlohonolofatsa Lentsoe la Hau joale. Thusa mohlanka oa Hau, re tlotsese tšebeletso. Tlotsa pelo e 'ngoe le e 'ngoe e utloang. 'Me joale re tla bua feelsa, Ntate. U re bolelle seo re lokelang ho se bua, le ho re bolella seo re lokelang ho se etsa. Re U lebeletse ho ba le rona kopanong.

⁴⁵ Ke U leboha ka lifela tsena tse monate bosiusing bona, lipina tseo tse ntle. Mohlankana enoa morao mona, Moena Heimer, u sa tsoa bina sefela se monate seo, *MoGalelea Eo*. Eka Moeti eo oa Galelea a ka kena joale bosiusing bona. Re ke re utloe lentsoe la Hae le bua le kelello e tšoenyehileng, joalokaha A entse mohla metsi a bolotsana, "Khutsa, u re tu." 'Me pelo e 'ngoe le e 'ngoe e khathetseng e fole. Re e kopa ka Lebitso la Jesu. Amen.

A rea nqalo lebitso la Jehova-jire, joalokaha ho ngoliloe, ho thoe: Ho tla bonahala thabeng ea MORENA.

⁴⁶ Joale re batla ho qala ka mophetoa e moholo enoa. 'Me hosane... Joale, ha Morena a ratile, re tla leka ho finyella qetello ea Abraham bosiusing bona. 'Me hosane, ekaba temana e mabapi le pholiso ea Khalalelo.

⁴⁷ Morena u bile molemo ho rona mona. Re utloile mapaki a lintho tse etsahetseng. 'Me ke thabile haholo! 'Me re fumane bosiu bo le bong, mola oa thapelo o felletseng, kapa ho ba mema. 'Me ha re a bona mofokoli a le mong ka mohahong, setulo sa bakuli, nqa efe feelsa, empa ba ne ba eme, ba tsamaea hohle, ba ikela.

⁴⁸ 'Me joale bosiu bo bong le bo bong Moea o Halalelang u kene ka Boteng ba Oona bo babatsehang, bo tsotehang, le ho tloha bo haola le letšoelie, ho Itlaleha, A le teng mona. Joale, re tšoanelia ho Mo lumela. Le a bona, O batla hore le Mo lumele. Tlotlo e

phahameng ka ho fetisia eo u ka e isang ho Molimo ke ho Mo lumela. U tšoanelo ho lumela. "Ea tleng ho Molimo eka khona a lumela hore O teng." 'Me joale lumelang Eena!

⁴⁹ 'Me ere ke sa nka Abrahama, leeto, ke hobane ke leka ho haha tumelo feela bakeng sa sehlohlolo se seholo, ho lumella batho ho bona hore ke bomang.

⁵⁰ Ke bona bothata boo. Ke fumana lihlopha tse peli tsa batho, ha ke ntse ke hahlala. Se seng sa tsona ke pentekosta, se seng sa molaotheo. Joale, boramotheo ho latela malulo ba tseba moo ba leng teng, seo ba leng sona, empa ha ba e amahanya le tumelo. Mapentekosta a ruile tumelo, empa ha a tsebe hore na ke bomang. Joale, joaloka monna ea nang le chelete bankeng, empa a sa tsebe ho ngola cheke; 'me e mong o khona ho ngola cheke, 'me ha a na chelete bankeng. Holane u ka ba kopanya, ntho e ka etsahala. Ha u ka fumana tumelo ea pentekosta le ka mohla le thuto ea molaomotheo, ha u ka khona le ka mohla... kapa ho fumana thuto ea motheo le tumelo ea pentekosta, ntho e 'ngoe e tla etsahala. Ke hantle.

⁵¹ Joale, kamoo nka ratang ho ntša bopaki mona, ha ke ne ke bona, sekolo sa Luthere, ba makholo a mane ba amohela Kolobetso ea Moea o Halalelang ke ntse ke bua le bona ka eona. Oh, khili, e ne e le pono e tlotlehang, ho ba tsebisa seo. Ha se bona, hoba ke Maluthere, ha ba balloe kantle.

⁵² Ha ho letho khahlano le Luthere, Baptise, Methodise, u ka bang mang, Katolike. Ha ke khahlano le lintho tseo. Ha ke khahlano le batho bao. Ke tsamaiso e ba fupereng, eo ke buang khahlanong le eona. Ha ho letho khahlano le motho ka bomong, bohle ke batho bao Kreste a ba shoetseng, Katolike, Mojuda, e ka ba mang. Ke tsamaiso. Joalo ka Mohammedane, maSikhse, Jaine, e ka bang eng feela, ke tsamaiso. Buddha ke tsamaiso, le a bona. Ha se batho ba—ba rapelang Buddha; ke tsamaiso e ba hulang.

⁵³ Ke ntho eona eo. Jesu o ne a se khahlano le batho. O ba shoetse. Empa litsamaiso tseo tse neng li Mo lelekela hole, li ba suthisetsa hole le Eena. Ke eona ntho eo joale.

⁵⁴ Joale ke ile ka nahana, ka ho nka Abrahama, ka ho tseba hobane e ne e etselitsoe Abrahama tšepiso e ne e lebisitsoe teng, le Peo ea Abrahama kamor'a hae. Joale ha re khutleng nakoana re hahe motheo, 'me re tobe temana ka kotloloho joale bosius bona nakoana.

⁵⁵ 'Me likarete tsa thapelo li tla fuoa mang ea batlang ho rapelloa. 'Me rona, haeba le sa li fumane bohle bosius bona, re tla ba fumana hosane. 'Me mang ea batlang ho rapelloa u lokela ho ba le setlankana sa thapelo. 'Me le fihle mona ka mashotharo kamora hora ea pele hosane, ho nka setlankana sa lona sa thapelo, hoba re batla ho qala kopano lekhatheng leo. 'Me re tla rapella motho e mong le e mong ea tšoereng setlankana sa thapelo hosane. Esale re leka, masiung, ho fumana ba se nang

likarete tsa thapelo, e le hore ba nang le likarete tsa thapelo ba fumane monyetla oa ho kena moleng oa thapelo. 'Me ba bang ba bitsoa kantle mono, ba se na likarete tsa thapelo. Ho finyella bobeli boo, mahlakore bobeli. Karet ea thapelo ha e bolele letho. Empa ha u fa motho karet ea thapelo, ho batla ho folisoa liperesente tse mashome a mane lekhatheng leo, ke uena ea nahananang hore u feta moleng; ntho eo a ka e tšoarang, ntho eo a ka e shebang, kapa ho hong. 'Me e—e moshanyana o tla aba likarete tsa thapelo hosane ka masho-tharo ka mora hora ea pele, hore ba tle ba falle ka hora ea bobeli, hore tse ling e—e litlhakiso tsa letsatsi ba li finyelle.

⁵⁶ 'Me lona ba batlang setšoantšo, buka, kapa teipi, e lokeloa ho fumanoa bosiung bona. Ha ho rekisoe ka Sontaha; ha re lumelle seo, ho li rekisa. Re hlompha Sontaha, ha re rekise ho hang ka Sontaha. 'Me libuka tseña le lintho, ha se letho ho 'na, ke libuka tseño batho ba li ngotseng ka tšebetso ea ka. Litšoantšo tseño Mokhatlo oa Lifoto oa Amerika o li nkileng, 'me ke tsa Studio sa Douglas, tse babaletsoeng ka litokelo tsa qopitso. Buka ke ea Moena Gordon Lindsay le Chaplain Julius Stadsklev. Re a li reka 'me re li tlisa kopanong, 'me re li rekise ka theko eo re e li fumanang ka eona, 'me re a lahleheloa ho tsona. 'Me kamehla re buile sena, haeba mang... Ke bolelletse batho ba rekisang libuka, "Ha monna kapa mosali a nyoloha, motho ea futsanehileng, a se na chelete ho reka buka eo; le ba fe eona, leha ho le joalo. 'Me re tla... Ke tla bona hore e hlokometsoe." 'Me haeba u fumane buka 'me e sa tšoanele seo e leng sona, e khutlise. Ba ke ke ba e khutlisa haese ho u buseltsa chelete, le a bona. E mpa e le feela ntho e ka thusang tumelo ea hau. Re ntse re leka ho e etsetsa morero oo, ho seng joalo re ka be re sa e lumella mona. Ke hantle feela. Ka hona joale, bosiung bona, hopolang, ba tla ema kalaneng ea libuka. Motsoalle oa ka ea molemo, Mongh. le Mof. Wood. Ekare nka be ke e na le nako ho phetha bopaki ba bona, kamoo mora oa bona a folisitsoeng pholio. Le lintho tse ling tse ngata li—li etsahetse, tsa batho kahara kopano mona.

⁵⁷ Joale ha re bueng ka motheo oa Abrahama. Pele, Molimo u kopane le Abrahama, kantle le lipeelo, selekane seo O se entseng le Abrahama. Ho se letho ho hang; Abrahama a sa lokela ho etsa letho haese ho lumela Molimo. Selekane e ne e le ka mohau o iphotlileng feela, 'me ha se se na lipeelo. Ha se "ha u ka etsa." Molimo o itse, "Ke se ke entse!" 'Me joale motho e mong le e mong...

⁵⁸ Hopolang, Peo eohle ea Abrahama e kileng ea tla ho Molimo, e tla ka ho tšoana. Ha ho letho leo u ka le etsang! U ne u ka sitoa ho ipholosa joaloka u ka nka marapo a butshu ea hau 'me oa tšethema khoeli. U ke ke oa ipholosa. Ha ho motho ea kileng a batla Molimo; ke Molimo o batlang motho. "Ha se lona le Nkhethileng," Jesu o boletse, "ke 'Na ke le khethileng."

⁵⁹ Pele, joale, na u ka tsoa mona oa bolella kolobe hore e fositse, ka ho ja bohlasoa? E tla u bolella ho ea shebana le litaba tse u amang. Empa ho hlokahala ntho e ka fetolang semelo sa eona, ho e elellisoa phoso ea eona. Ntho e tlameha ho etsahalla kolobe eo, pele.

⁶⁰ Ke ka baka leo ho-bitsoang Bakreste hangata ba pitika seretseng, ho khutlela sebeng, ke hobane... U ka hlatsoa kolobe, 'me oa e farefa linala, ho tšasa molomo ka pilo. Hoo, ho phoso, e bang ke eng. Litlotsa molomo, ha ho joalo, kapa ho hong? Ke a etsa, nyee eo eohle, ke a e ferekanya. Le tseba seo e leng sona, leha ho le joalo. Ha u ka tlotsa kolobehali ea khale ka litlotsa molomo le—le, u a tseba, ho e sebetsa ka mesebetsi e meng eohle, e tla tloha e-ea seretseng hantle, e boela e ipitika. Hobaneng? Tšali eo ke kolobe, le ho qaleng. Mokhoa oa ho e fetola le ka mohla, ke ho fetola semelo sa eona.

⁶¹ Ke ona feela mokhoa oo monna kapa mosali a ka tsepamang le Molimo, ke ho fetola semelo, ho hloekisa, ho shoa sebeng sa monna oa khale, le ho tsoaloa bocha ke Moea oa Molimo. 'Me, ke hore, Kreste ke Moea oa Molimo, 'me Kreste ke Lentsoe. Ebe moo e pakang 'moho le Lentsoe. Ba tla e khona joalo feela le ka mohla.

⁶² Joale, Abrahama o ne a batla Motse oo Mohahi le Moetsi oa Oona e neng e le Molimo. 'Me kajeno re baeti, bajaki, ba batlang Motse oo Moahi le Moetsi oa Oona e leng Molimo. Bonang! Abrahama, pele a ka tseba, moloho oa mofuta o ne o ahile ka ho eena, a ba a batla Motse.

⁶³ Kajeno, ha ke ne ke haola le mohatsa ka, ke itse, "Tuloana e ratehang e lutseng mona holim'a leralla, ha re re lilemo tse makholo a mararo tse fetileng; patsi e ntle, le mahong a fafohileng. Motho a kena, ba li rema, ba silafatsa melapo. E ka ba sebaka se setle ho lula mona." Yaa, empa ha u sheba, o hahile matlo. Eaba ba qala ba ata. Sebe le moferefere tsa qala tsa kena. Hollywood ea kena ea mo atamela, ea kena ka limofi, ka thelebishene. Ka... 'Me joale ke motse, o silafetseng, o tletseng sebe!

⁶⁴ 'Me ruri, joaloka batho, ntho e teng ka ho bona e ratang ho aha 'moho, ho moahelani, le ho loka. Ruri Motse o teng kae-kae! Boliba bo arabelana le Boliba hape!

⁶⁵ Abrahama o bone metse ea mehleng ea hae, Ure oa Kaldea. 'Me o tsebile seo hobane ntho e ne e tsetsela ka ho eena, Motse o fapaneng o ne o le teng, oo Mohahi le Moetsi oa Oona e neng e le Molimo. 'Me Molimo o bone seo ka ho Abrahama, oa 'molella, "Ikhethe joale, tsoa."

⁶⁶ Joale, Abrahama, ntho e le 'ngoe eo ke batlang hore le e lemohe, o mametse Lentsoe la Molimo ka bottlalo.

⁶⁷ Hopolang seo kamehla! Ke Molaetsa oa ka oo. U tšoanela ho mamela Lentsoe. 'Me ka ho tseba ntho e khahlano le Lona, e

tlohele. E ka bonahala e le ntle, empa u se ke ua beha mabaka khahlano le Lentsoe la Molimo.

⁶⁸ Ke ntho ea pele eo Satane a e entseng, a bea mabaka khahlano le Lentsoe la Molimo, ho Eva. 'Me tšali ha a ka a Le belaela. O mpile a beha mabaka feela. Satane o ile a Le beela mabaka.

⁶⁹ 'Me ba sebetsa joalo kajeno. "Na mabaka ha e utloahale haeba re lokela ho etsa *sena*? Na mabaka ha a utloahale?" Haeba e le khahlano le Lentsoe la Molimo, e tlohele! Ke kolu ea Satane.

⁷⁰ Ere Lentsoe, haeba Lentsoe le ahile ho uena . . . "Ha le lula ho 'Na, le Lentsoe la Ka ho lona, kopang seo le se batlang." Moea o Halalelang! "Ha le lula ho 'Na, Lentsoe la Ka ho lona," leo ke Lentsoe le entsoeng nama, "kopang seo le se batlang 'me se tla etsoa." Ke eona tsela. Tlosa litumeloana tsohle, lintho tsohle, le ho itšoarella Lentsoeng hobane ke Kreste. Hlokomelang, ke moo e tlang ho iponahatsa.

⁷¹ E mong o itse, "Moena Branham, lintho tseo u li tseba joang. Joang?"

⁷² Lintho tsena tseo u li bonang mona kopanong ke lintho tse nyenyan. Mang ea hahlaulang le likopano mona, o a tseba. Moea o Halalelang o senola lintho tse tlang ho hlaha liveke le likhoeli pakeng tsa nako. Le ho botsa mang, "Na e kile ea hloleha hang le ka mohla?" E ke ke ea hloleha, le a bona. "U e tseba joang?" Hobane ke tsepiso ea Lentsoe, 'me hora e fihlile. E tlameha ho phethahala. Joale, ha ke tsebe, ho tla ba le ba 'maloa, e tla lumeloan ke ba 'maloa, empa e loketse ho tsoelapele ka ho tšoana. 'Me na le eleletsoe le ka mohla, e feta hantle holim'a lihlooho tsa batho, 'me e se e fetile entsoe le pele ba e elelloa. Kamehla ka tsela eo.

⁷³ Ho lona batho ba Katolike, na le tseba seo kereke ea lona e se entseng? Hobane Joan of Arc e ne e le—e le mohalaleli oa sebele oa Molimo, ea entseng mehlolo ea Molimo, ea porofetileng ka Molimo, 'me le 'mitsitse moloi, la mo chesa thupeng; a hoeletsa ho hauheloa, 'me le mo chesitse thupeng. Makholo a lilemo hamorao, la elelloa hore le ne le fositse, eaba le mo etsa mohalaleli. O le fetile mohoalotso, 'me ha le a mo tseba.

Elia o fetile joalo, ha ba mo tseba. "Moqhekanyetsi oa oa khale!"

⁷⁴ Kreste o fetile joalo, ha ba ka ba Mo tseba kamora lefu la Hae, kepelo, le tsoho. Ke Molimo o hlophisang seo. 'Me ehlile e reba mahlo a mosalumele. 'Me e bontsitse . . . A re, "Ke e patetse mahlo a ba bohlale le ba masene, le ho e senolela masea a batlang ho ithuta." Kreste o lebohile Molimo ka ho etsa hoo. Le a bona?

Ikokobetse. E lumele. Leka Lentsoe.

⁷⁵ Jesu o itse, "Batlisang Mangolo, hoba ho ona le nahana hore le na le Bophelo Bosafeleng, athe ke ona a Mpakang. Le loketse

le be le tsebile hora.” Ho re, ho borella Bafarisi, “Baikaketsi ting, le lemoha maemo a leholimo. Empa lipontšo tsa mehla, ha le li lemoha. Hoba holane le Ntsebile, le ka be le tsebile letsatsi la Ka.” E fetile holima bona hantle, ha ba e tseba ho fihlala e fetile. Hlokome lang joale Lentsoe le leng bohloko a hakana!

⁷⁶ ‘Me le hlokomele e mong, re sa le ho eona, Lota. Jesu o boletse, ka Sebele, “Hopolang mosali oa Lota.” Haeba Lentsoe le se bohloko a hakaalo, haeba mabaka a itoketse; eitseha lengelo i leo le borella Lota le lelapa la hae, “E-eang Tsoare, empa le se ke la hetla!” ‘Me mosali oa Lota, ka nthoana e sa tsebisahaleng ea ho retoloha le ho hetla, empa e ne e le khahlano le Lentsoe, a fetoha sefika sa letsoai.

⁷⁷ Ebe le re, “Ho borella basali ka ho kuta moriri oa bona, ho apara liaparo . . . ?” Molimo o e laetse ho se etsoe! U latela Lentsoe. Lota mosali oa hae, ntle le pelaelo, o ne a lokile, empa ha a latela Molao ho Lentsoe. Lota! Eva e ne e le mosali ea lokileng, empa ha a ka a latela Molao ho Lentsoe; a mpa a e behela mabaka nakoana.

⁷⁸ “Na ha se taba e utloahalang, Moena Branham, hore re ka etsa see? Ke moahi oa Amerika, ke—ke na le tokelo ea ho etsa borata ba ka. Ke tokelo ea ka ea Moamerika.” Ke tokelo ea hau ea Moamerika, empa ha se tokelo ea hau ea Mokreste. Hobane, ka Mokreste, u nku; ‘me nku e tela litokelo tsa eona. E robala e khutsitse tu ‘me e u lumella ho e amoha litokelo tsohle tsa eona. Empa pōli e tla rahaka e fehla sefego ka eona. Ke hantle. Empa nku e tela litokelo tsa eona. ‘Me kamehla Mokreste o tela litokelo tsa hae tsa bochaba haeba e le khahlano le litokelo tsa hau tsa Bokreste.

⁷⁹ Mosali oa Lota o hetlile feela, [Moena Branham u thanya monoana oa hae—Mohl.] eaba ke phetho! Joale hoo ho entseng? E re borella mona ho Abrahama, le Lota, hore ntho eo ba e tekileng mono, mohlala. ‘Me re ke ke ra e balehela.

⁸⁰ Baheberu, khaolo ea 11, e boletse lintho tsena e le mohlala ho rona. Haele moo re teetsoe hare ke leruhali le le kaalo la lipaki, eka khona re lahlele kathoko sebe se seng le se seng (Sebe ke’ng? Ho se lumele.), sebe se seng le se seng, ho se lumele ho hong le ho hong ha Lentsoe la Molimo, ho re tšoasang feela.

⁸¹ Re ema khahlano le ntho, re re, “Be, ba rera seo, hore seo . . . ” Le se ke la etsa joalo! U etse feela seo Molimo o se laetseng ho etsoa. Tsepama le Sona, ho fihla letereng!

Ho re, “Ha e etse phapang ea letho.”

⁸² Ho lokile, nka bua ho le hong feela ke seo Lentsoe le se buang. ‘Me Jesu o boletse seo a tiile, “Hopolang mosali oa Lota.” O mpile a sheba holim’ a lehetla la hae feela. Eva a ema nakoana feela. Ke phetho seo a se entseng. Mosali oa Lota o hetlile feela. ‘Me haeba . . . Molimo oa fetola monna eo ea lokileng, Lota, mosali oa hae, pilara ea letsoai, ka nthoana e sa tsebisahaleng feela, ka ho

se mamele Melao ea Oona ho lekana ka ho hetla morao feela ho bona seo mollo oo o neng o se etsa, 'me a fetoha pilara ea letsoai, 'me le kajeno o sa eme e le mohlala hore Molimo o tiile ka seo O se buang.

⁸³ Oh, hola tumelo ea sebele e ka ankora bathong! "Tumelo e tla ka ho utloa, ho utloa Lentsoe la Molimo."

⁸⁴ Eva a ema nakoana. Ke phetho seo a ileng a lokela ho se etsa. Satane a mo tšoasa, 'me a mo mena-mena ka mabaka feela. "Na ha se ntho e utloahalang? Haeba Khaitseli *Sekete-kete* a ka e etsa, na le uena u ke ke oa e etsa, hape? Ke mohatsa molisa." Ha ke tsotelle hore tšali ke mang, kapa hore tona ke mang. Haeba e le khahlano le Lentsoe, u se ke oa e mamela. Tsoelapele hantle! Mehlala!

⁸⁵ Abrahama o entse joalo. Le nahana hore mahlale a—a meriana a mo beetse mabaka hakae, ba letsatsi leo, hore a ke ke a fumana lesea leo? 'Me ho ka thoeng mohla a neng a le mashosupa-hlano? Re nto mo fihlela a le lekholo, a ntse a e lumetse ka matla ho feta khetlo la pele, a nkile lilemo tse mashopeli-hlano ho haha tumelo e ngata holim'a eona. Ke rata seo. E, monghali.

⁸⁶ Hape ke batla ho hulela maikutlo a lona ho se seng pele re nyoloha. Na le hlokometse? Ke—ke tšepa hore le e fumane. Holim'a selekane seo se tiisitsoeng, ka ho ngola selekane seo le ho se hahola, na le e fumane? Phahamisang matsoho a lona haeba le entse, le fumane seo e neng e se bolela. Selekane se ngotseng, se tabotsoe, Molimo o nkang ponahatso ea botrintase, ho bo etsa ntho e le 'ngoe; ho se tabola, ho nyollela 'mele Holimo, le ho khutlisetsa Moea o Halalelang ho phela ka har'a Kereke, ho hlahisa eona ntho eo 'mele oo o kileng oa e hlahisa, joaloka mosali, Monyaluo; Moea o tšoanang, mosebetsi e tšoanang, Thuto e tšoanang, ntho e 'ngoe le e 'ngoe hantle ka ho tšoana hantle feela le seo A neng a le sona, pontšo eona eo, "Jesu Kreste eena maobane, kajeno, le kamehla." Hlokometlang!

Mohlomong mona, ho ka tšoha, ho lutse Mojuda.

⁸⁷ Le a bona, Molimo o etsa lintho tseo, 'me e kena har'a batho hantle athe ha ba e fumane.

⁸⁸ Joaloka ha ke ne ke hlalosa mabapi le basali ba ikhurumetsang sefahleho ha ba nyaloa. Hobaneng? Mohlomong ha ba utloisise seo. Empa seo ba se etsang, ke sena, ho tseba hore ke 'mele, ha ba na hlooho, monna ke hlooho ea bona. Rebeka o ile a ikhurumetsa ke hona. 'Me le Kereke e tlameha ho ikhurumetsa ke hona le ho inehela ho Kreste, hobane Ke Hlooho, 'me ke Lentsoe.

⁸⁹ Joale, Mojuda, Yom Kippur, mohla ba jang selallo, kapa Paseka, mang le mang o a tseba, eo e leng Mojuda, 'me o a tseba tlas'a sekolahelo seo ke sengoathoana se robiloeng sa kosha. 'Me ha ho Mojuda eo ke mo tsebang, eo nkileng ka bua le eena, ea ka

hlilosang lebaka la lerathana leo la kosha e robiloeng. Khele, ke ena thasisetsong ea selekane, 'mele o robiloeng oa Kreste, mohla A neng a ngoatha Molimo ho motho; E ne e le Molimo le motho 'moho. 'Me mohla A neng a nyolla Moea... 'Me Jesu o boletse, mamelang, "Ka tsatsi leo le tla tseba hobane Ke ho Ntate, Ntate o ho 'Na; 'Na ka ho lona, le lona ka ho 'Na." Ke Molimo ka hara batho ba Oona! Molimo o tšoanang!

⁹⁰ Mono O ile oa bapisa, re buile ka eona maobane bosiu. Molimo oa theoha, tlhaku e kholo M-o-r-e-n-a, Jehova-Jire, Jehovarapha, Jehova-manasse, Elohim, Rabokhoni-Bohle, Ea Matla, Ea-Matsoele, maemeli a Hae 'ohle le ntho eohle, ea bonahatoang 'meleng oa motho ea jang lijo tsa motho, 'me oa ba nyamella. Molimo!

⁹¹ 'Me Jesu, mohla A tlileng, O boletse, "Joaloka letsatsing leo, ho tla ba joalo." Molimo!

⁹² Eo ke kosha e robeliloeng tlas'a sekhurumetso, sengoathoana se robiloeng; ha se seo ba se jang, empa Se robiloeng. Hobaneng ba sa e utloisise?

⁹³ Ho tšoana le mohla Jesu a neng a nka e—e matlaloana 'me a qala a bala. O balile karolo ea temana, 'me a e lesa, karolo eohle ea eona, hoba e ne e etselitsoe Eena feela letsatsing leo. Karolo e setseng ea temana e ne e amana le ho Tla ha Hae Labobel.

⁹⁴ Ka lona lebaka leo Bajuda ha ba utloisise seo, hobane ba ne ba loketse ho foufatsoa. Ha ba ka ba bona Messia oa bona, 'me koana O ne a le teng. 'Me nako le nako enereha ba ja Paseka ea bona—ea bona, kosha e robiloeng e ne e le eo hape, 'me ba sa e tsebe.

Ke botsitse rabi. A re, "Re rutoa ho etsa joalo."

Ka re, "Hobaneng le etsa hoo?"

A re, "Ha ke tsebe. Ha ho motho ea tsebang."

⁹⁵ Le a bona, mosali o ikhurumetsa sefahleho, koana ha a lemohe. Sebakeng sa ho kena le ho lumella monna oa hae ho ba hlooho ea hae, eena ke hlooho ea monna. Eo ke khopamiso. Joale boo ke boitšoaro ba Moamerika.

⁹⁶ Empa eona, ke kosha e robiloeng. Hape re a eleloa, hape ke ne ke batla ho hlokoma mona, ha ke haha motheo joale pele re theohela karolong ea makhonthe eo re batlang ho bua ka eona bosiung bona.

⁹⁷ Bosiung ba maobane le sa hopola mohla Abrahama, selekane se ne se hlabjoa le Abrahama le Peo ea hae e mo latelang. Joale, ho ne ho e na le peo ea hlaho ea Abrahama, khato ea tumelo e hlahisitse seo; empa Peo ea makhonthe ea Abrahama e ne e le Kreste, Bibebe... e ne e le Peo ea borena ea Abrahama. Joale hlokamelang.

⁹⁸ Abrahama, pele ho tšenyeho ea mollo letsatsing la hae, Abrahama o ne a etsetsoe pontšo, seholpha sa Hae se thontsoeng. 'Me e ne e le hore, Molimo o theohile ka sebopeho sa motho, oa furalla tente eo Sara a neng a le ho eona ka mokokotlo oa Hae, le ho bolela seo Sara a neng a se bua ka tenteng. 'Me Jesu o ile a fihla a bolela hore ntho eona eo e tla fihla qetellong ea mongoaha. Joale, eo e ne e le Abrahama.

⁹⁹ E ntano ba peo ea hae ea hlaho, mohla Messia a fihlang. 'Me Simone o tlide ho Jesu, 'me A 'molella hore lebitso la hae e ne e le Simone, 'me e ne e le mora Jonase, ho tseba sephiri sa pelo ea hae. Ho bolella Filipi... kapa Nathanaele, eo Filipi a ileng a mo fumana, "Ke u bone u le tlasa sefate." Ho bolella mosali selibeng, "U bile le banna ba bahlano"; 'me a re, "Monghali, ke a bona hore U moporofeta." Le a bona, qetello ea peo ea hlaho ea Abrahama e fumane pontšo eo.

¹⁰⁰ 'Me ho lepiloe pele ke Peo ea borena ka Seqo, Kreste, hore Peo ea borena, qetellong ea matsatsi a bona, e ne e tla fumana ntho eona eo. Joale ke a tšepa hore re a e fumana.

¹⁰¹ O ile a mo fetola. Hlokamelang, Molimo oa fetola lebitso la Abrahama. Ke mpe ke tlohele taba eo. Mohla ke khutlang tsoseletsong e teletsana, re tla kena ho eona. Oa tlameha ho fetola lebitso la hae ho tloha ho lebitso la hae la lefatše, ho ea ho lebitso leo Molimo o mo reileng lona.

¹⁰² U re, "Ebe lebitso la motho le amana joang le eng?" Oh, moena, hoja feela u tsebile! Khele, a mang a mabitso ana a sejoale ao re a fumanang! Ha ke batle ho a bitsa, hoba e tla le utloisa bohloko. Empa Molimo o na le mabitso a bolelang lintho, le fetola mocha 'ohle. Oh, u re, "Bosaoana!"

¹⁰³ Ho ka thoeng ka—ho ka thoeng ka Jakobo? Pele e e-ba khosana pel'a Molimo, a tlameha ho fetoloa lebitso ho tloha ho Jakobo ho ea ho Israele. Na ho joalo? Ehlide. Pauluse; Saule a tlameha ho fetoleloa lebitso la hae ho Pauluse. Oh, re ka bitsa ba bakae, le ho bolela hore Molimo o fetotse mabitso a bona! Abrame ho Abrahama, Sarai ho Sara, ho fetola mabitso a bona. Oh, khili! Ke leseho le lekakang, ho kena kerekeng ea itseng le seholpha sa bakhethoa, le ho tloha ho ruta seo, ho bona dialleluia pelong, ha u bona seo Molimo o se etsang.

¹⁰⁴ Joale, maobane bosiu ke ne ke hlalosa "lipakeng tsa mola" le "ho se thasisetsa." Ke batla feela ho e otla hape pele ke kena temaneng ea ka. Hore, Molimo o ile oa fetola Abrahama ho tloha ho monna oa khale ea sosobaneng, eena le Sara, ho khutlela ho banyalani ba bacha, ho fetola 'mopo oa nama ea bona pele ba ka amohela mora oa tšepiso. Pontšo ea ho qetela eo ba e fumaneng e ne e le ponahatso ea Molimo ka nama, o tsebileng ho bala pelo ea mosali ka mora Hae, ka tenteng. 'Me ntho e latelang e le hore mebele ea bona e ile ea fetoloa. Joale, maobane bosiu ke ne ke

siuoa ke nako, 'me ka utloa ba bang ba ipotsa taba eo. Ke batla ho e atametsa haufi ho feta.

¹⁰⁵ Joale, bopaki ba eona, mohla ba babeli ba neng ba nka leetohali leo, ba ne ba fetotsoe ka botlalo. 'Me Bibele e boletse, "Bobeli ba ne ba tsofetse haholo lilemong. 'Me 'mele oa Abrahama o se o batla o ichoeletse, le popelo ea Sara e ne e shoele." Na ho ne ho le joalo? Rea tseba hoba ba ne ba shoele, empa Molimo oa ba fetola. Joale ho le kholisetsa eona, hore O e entse. Pele, hobaneng Mofilista eo (kapa e seng e . . .), e, ke lumela e ne e le khosi ea Mofilesta, a ile a rata Sara, mosalimoholo? 'Me o ne a khahleha ho talingoeng.

¹⁰⁶ Ntho e 'ngoe. Mohla Isaaka a neng a hlaha, 'me Sara le Abrahama ba se ba tsofetse haholo lilemong, ba se ba tla shoa, 'me ba phetse ho fihlela, 'me Isaaka o nyetse a le lilemo tse mashome a mane; Sara a shoa. 'Me Abrahama a nyala mosali, Katura, 'me a tsoala bara ba bahlano, ba tšeletseng, kea khlooa, kantle ho barali, ka morao ho moo; 'me mona, lilemong tse mashotšeleta tse fetileng, o ne a se a batla a ichoeletse! K-e-t-u-r-a-h, Keturah. A nyala Katura, lilemo tse mashohlano-tšeleta hamorao, 'me a tsoala bara ba tšeletseng kantle ho barali ba hae; 'me lilemo tse mashotšeleta pele ho moo, o ne a batla a shoele. Alleluia! Ke moo! Tšepiso ea Molimo e tiile. Amen. Oh, ke a E rata!

¹⁰⁷ Ho iphumana feela le ho bala! Kajeno, morao merung, ha ke ntse ke bala, ke batla ho hhalosa lethoana.

¹⁰⁸ Iseraele. Batho ba Molimo tsatsi le leng ha ba le tlase Egepeta, ba rekitsoe bokhobeng, 'me ba ke ke ithusa ka ho ba mono. Leano le leholo la Molimo la boitherolopele le ne le ba rometse mono. O na be a boleletse Abrahama hoba ba tla jaka naheng eselete lilemo tse makholo a mane. 'Me teng ba itšoanelle le batho ba bang, 'me e ne e le makhoa. Haeba e—haeba monna oa Moegepeta a ne a batla ho rusulla banana ba bacha ba Baheberu, ho ke ke ha buoa letho. Haeba ba batla ho bolaea bahlankana ba bona, ba ne ba ba bolaea, ho ke ke ha buuoia letho. E ne e le makhoa. Ba ba lahlella bohobe ba bona bo hlobo. Ba bo ja, kapa ha ba fumane letho; tletlebo, ho bolaoa! Sebaka se se kakang sa batho ba Molimo!

¹⁰⁹ Empa ka tsatsi le leng, alleluia, Molimo oa hopola tšepiso ea Oona ho Abrahama. Khanya! Joale ke qala ke ikutloa ke tletse borapeli hape. Hlokamelang, Molimo oa hopola tšepiso ea Oona ho Abrahama. 'Me Oa tlotsa moporofeta, ka Topallo ea Mollo holima hae, 'me a theohela lefatšeng a qala a ba hopotsa tšepiso ea Molimo e neng e ke ke ea hlolleha. 'Me Molimo o ne o le teng ho netefatsa Lentsoe la Oona. Hantle. A ba bolella ka naha e kollang lebese le linotši, eo Molimo o neng o ba file eona. Ba hoanta ba tsoa Egepeta ka matla a bopaki ba moporofeta enoa Topallo ea

Mollo e le holima hae, hoba a ne a romiloe. 'Me Molimo o ne o pakile hore O na le eena.

¹¹⁰ Joale eaba ba fihla tulong e bitsoang Kadeshe-barnea. E kile ea ba setulo sa kahlolo sa lefatše khetlo le leng, Kadesh-barnea. 'Me mono ha fihleloa mohlabani har'a bona, ea bitsoang Joshua. 'Me lentsoe *Joshua*, ka Seheberu, le bolela "Jehova-mopholosi." 'Me Joshua, mohlabani e moholo. . . . Joale hopolang, ba ne ba eso bone lefatše lena, ba ne ba utloetse ka lona feela. Na le bona papiso joale? Ba ne ba utloetse feela ka naha. Ba tetse tsohle ho ea lefatšeng lena, hobane Lentsoe la Morena le ne le tlisitsoe ho bona, le ho thasisetsa hore ba ne ba le leetong la bona ho ea lefatšeng lena. Ke papapiso e kakang ea Kereke, leetong la bona, ba sa tsebe letho ka lona, ho se le a mong oa bona ea kileng a fihla mono. Empa Joshua, eitseha ba atamela moeli, Kadeshe, setulo sa kahlolo, moo kahlolo e kileng ea liheloa holim'a Israele, ho tsoa ho ea kileng a tšela 'me a khutla. 'Me Joshua a tšela Jordane, ho kena lefatšeng la pallo, le ho khutlisa kholiso e reng le ne le le hantle feela kamoo Molimo o le boletseng. 'Me ba ne ba ka latsoa merara e neng e lenngoe naheng eo e bokoang.

¹¹¹ Joale, ba ne ba tšepisitsoe ha thoe ba ka rua lehae leo ba ka lokolohang ho lona, ba ka hōlisa bana ba bona ka bokhabane le—le tšabong ea bomolimo, ho fumana kereke, le joalo-joalo. Ba ne ba thabile hakaakang ha ba tšeleta naheng eo 'me ba fumana lehae lena, ho tloha ho ba makhoba. Hlokomelang. Empa eitseha ba tšela, ba phela maphelo a bona, e ne e le ntho e kholo. Empa qetellong maralla a omeloa ka majoe a mabitla. Ba tsafala ba shoa, ho tsafala le ho shoa, batho ba Molimo.

¹¹² Eaba ka tsatsi le leng ha fihla Mohlabani e mong e moholo, ea ba fetisang bohole ka boholo, Jehova-Mopholosi, *Jesu*, O tlide, 'me A re, "Bophelo bo teng ka ng'ane ho lefu! Hobane, meaho e mengata ka tlung ea Ntate oa Ka. Holane ho a ba joalo, nka be Ke le boleletse. Ke tla ea le lokisetza bolulo, le ho khutla hape ho le amohela ho 'Na." 'Me Mohlabani enoa e moholo a fihla Kadesh-barnea ea Hae, setulo sa kahlolo sa rona bohole, Kalvari! Teng A Ipelesa bokhopo ba rona bohole. 'Me A tšela noka ea Jordane eo re e bitsang lefu. 'Me ka letsatsi la boraro A tsoha hape, joaloka Joshua ea tsoang mose ho noka, ho tlisa bopaki bo reng "motho ea shoeleng a ka boela a phela."

¹¹³ 'Me A re, ho etsa ea lona . . . hore le kholisehe, "Ke batla le nyolohelle motseng oa Jerusalema, 'me le eme teng. Ke tla le fa tebeletso ea Lona. Ke tla le fa bopaki, peeletso." 'Me ba nyolohela motseng oa Jerusalema 'me ba ema ho fihlela Bophelo Bosafeleng bo fihla eka moea o fokang ka sefefo.

¹¹⁴ 'Me kajeno, kamor'a lilemo tse likete tse peli, re ntse re bolokile bopaki boo bo reng re faletse lefung ho kena Bophelong. Joshua oa rona o khutlisitse bopaki, 'me re leetong la rona le eang Lefatšeng leo la pallo, ho latsoa lineo tsa leholimo tsa

Molimo tseo A li buselitseng ho rona. E hlokomeleng, e babatseha hakakang! Shebang moo u kileng oa ba teng. Letaho . . .

¹¹⁵ Ke kopane le moena kajeno; o ile a arubetsoa ke maikutlo a hlollang ho thinyetsa seterateng se itseng, 'me a tsamaea sebakana. Ke lebala lebitso la monna eo. Ekaba o ka kopanong mona. Koana, haeba a le sieo, khele, Molimo o bile molemo ho eena. Ke Moindia, Moindia ka 'moho. O tsoa Virginia. Moea o Halalelang o mpoleletse, o sa e bolele. Ke ne ke ntšitse mohatsa ka. Ho re, "Theoha ka tsela *ena*, 'me u thinye koung *ena*." Ka theohela mono. Oh, e etsahala ka nako tsohle. "Ema hona *mona*." Eaba ke ema mono metsotsi e seng mekae. Ho re, "Retoloha 'me u khutlele morao ka nqa *ena*." 'Me, hoba ke etse joalo, ka kopana le eena.

¹¹⁶ A re, "Moena Branham, ke a u tseba." Ho re, "Nkile ka fihla Jeffersonville, le ho u batla." Le ho re ke . . . "U ne u le mose ho maoatle." Empa esale e le letaho, bophelong ba hae. Ka mo tšoara ka letsoho, a sa tsebe seo ke se etsang. 'Me a jeo a lefū la sebete le le mokhahlelong oa ho qetela. Eare ke sa eme mono ke mo tšoere ka letsoho, thothomelo ea ntessa. Eng? O ile a fola. Hantle mono koung ea seterata, ba e utloa motseng oa heno.

¹¹⁷ Ha ke tsebe monna eo . . . Na o teng mona? Ha ke tsebe. Haeba a le teng, o . . . Ke—ha ke tsebe. O itse o—o ne a batlile ho khutlela hae. Ke nahana a ile a lokela ho tsamaea. E ne e le—e le monna oa Moindia, ke a kholoa o ne a nyetse e—e mosali e mosoue. 'Me ton a ne e tsoa Virginia. 'Me ke lebala lebitso la hae. O ne a lula tlase mona tikolohong ea Logar kapa ntho e kang eo. 'Me a ile a fihla koana Jeffersonville. Empa a apareloa ke maikutlo a tsamaela nqa koung; Moea o Halalelang o itse, "Theoha ka tsela *ena*." Oho Molimo, hauhela! Ke moo.

¹¹⁸ Nka qeta lihora ka morao ho lihora, ho le bolella ka lintho tseo ke li boneng li etsahala le ho etsoa joalo. Hobaneng? Jesu, Mohlabani oa rona e moholo, o ile teng 'me a hapa lefatše, a hapa lefū, o hlotse lihele, o hlotse lebitla, a tsoha ka tsatsi la boraro, le ho re, "Ke na be ke shoele, 'me ke phela hape kamehla le mehla, 'me Ke na le linotlolo tsa lefū le lihele." Mohlolli ke eo, ho tloha A hahotse lesira ka lehare. Ke eo O eme mono!

¹¹⁹ Joaloka khaitseli oa khale oa 'mala. Ntšoareleng, metsoalle ea ka ea bammala ka mona. O ne a paka kopanong, 'me a sekametse nqa boroa ka puo ea hae. A re, "Be, ke batla ho le bolella bohole taba bosius bona." A re, "Ruri ha ke seo ke loketseng ho ba sona." 'Me a re, "Ruri ha ke seo ke batlang ho ba sona. Empa ke tseba ntho e le 'ngoe, ha ke seo nkileng ka ba sona." O ne a tsoa kae-kae!

¹²⁰ 'Me ke re, ho joalo bosius le bona! Re ne re lahlehile sebeng khetlo le leng. 'Me kajeno, ka ho amohela bopaki, tšepiso e khutlisitsoeng (peeletso ea pholohoa ea rona ea Bosafeleng), re tsohile lefung ho kena Bophelong, 'me re phela ka holim'a lona.

Ho tla ba joang mohla re fumanang tefo e tletseng, le ho tšela noka, ka borona, ho kena Lefatšeng leo le tlottlehang?

¹²¹ Teko e kholo! Joale Abrahama, kamora lintho tsenah tsohle tse babatsehang, a lekoa kamora ho fuo lehlohonolo. Abrahama o ile a lekoa.

¹²² Batho ba hloleha mono. Joale, mamelisang ka hloko joale, le se ke la e fosa. Bibele e boletse, ha thoe "Mora e mong le e mong ea tlang ho Molimo u lokela ho lauoa, ho otloa, ho shapuo. 'Me haeba re sa mamella taeo, re fetoha bana ba bonyatsi, e seng bana ba Molimo." Hoo ho paka tumelo ea rona e ne e se seo re neng re ipoletse sona, ha re na seo re ipoletseng sona. Joale re kena ho boCalvinisme ba makoma bo lokileng joale, ka hona re loketse ho hlokomela seo. Joale hlokomelang, "Mora e mong le e mong ea tlang ho Molimo eka khona a lauoe, ho lekoa," Lentsoe le mo khabela likoto, ho khethula tumeloana ka 'ngoe tlas'a hae; le a bona, ho lekoa, le ho bona haeba e le mora oa Molimo.

¹²³ Joale Abrahama, hoba a fuoe leseho, a lekoa hamorao.

¹²⁴ Nako eo e tatetse kae? Ha ke eso qete lengolo la ka, 'me ke nako ea ho koala. Na le ka 'mamella metsotso e meng e leshome-hlano? [Phutheho e re, "Amen."—Mohl.] Ke a leboha. Le apare hlompho. (Abrahama. Shebang Nohe.) Ha re e nkeng nakoana feela. Re ke ke ra potlaka; ha ho hlokahale. 'Me, khili, re potlakela eng? Ke lenama feela. Ke—ha ke tšoane le mathaka ana a ka emang, feela a ka e pheula feela joalo. Ke—ke—ke lenama, ke tlameha ho ema ho fihlela A mpha eona.

¹²⁵ Shebang Nohe, hoba Molimo a mo laele ho rera lilemo tse lekholo le mashome a mabeli, hantle feela potšeng ea lefatšehali la mahlale a fetang a rona kajeno. Oh, ehlile, ba hahile lipiramite. Re ka sitoa ho li haha. Ba hahile sefinkse. Re ka re sita ho se haha. Ba ne ba noka mebele e shebahale e le ea tlhaho le kajeno. Seo se ka re sita. Ba ne ba sibolotse mebala eo ba ka takang lintho ka eona, ha eso fetole 'mala lilemo tse likete tse 'nè. Ha re na eona. [Sekheo lebanteng—Mohl.] 'Me e ba supile ba ne ba theile tsoelopele e kang eo Jesu a e boletseng, "Joaloka mehleng ea Nohe." 'Me Nohe, lefatšeng leo la mahlale, a ntse a rera, "Pula e tla theoha leholimong, hoba Lentsoe la Molimo le boletse!" Nohe e ne e le moporofeta.

¹²⁶ 'Me ha le bona baporofeta bana ba hlaho, le mpe le lemohe, kahlolo e tseleng.

¹²⁷ Ka hona Nohe a rera, 'me batho ba e latola, ba mo tšeja sefahla-mahlo. Ke kholoa ba bang ba bona ba itse, "Taba eo ha e khemisane le tlapiso ea mahlale a rona." Huh!

¹²⁸ Ke a kholoa, ke ntho e kang ea kajeno. Ba re, "Ho hoeletsa le ho roris Molimo, le ho bokolla, le ntho ena eohle mona e bitsoang bophelo ba 'bahalaleli-bathethehi le lintho, ntho eohle ke ho fuluha maikutlo." Ha e khohlelane le tlapiso ea saense ea

bona, empa e lumellana le Bibele ea Molimo. Ke eona ntho ea bohlokhoa. Hlokomelang.

¹²⁹ Kea khlooa mahlale a tsoile a re, “Shebang, lethaka. Shebang, u—u batla u fapane hlooho. Shebang mona. Ke, re tšoere radara, re ka thunya khoeli kapa ra romela Sputnik holimo mono. Ha ho lerotholi le le leng la metsi lipakeng tsa mona le mane. Joale e tsoa hokae?”

¹³⁰ Ke utloa Nohe a re, “Molimo o itsalo! ’Me haeba Molimo o e boletse e le joalo, Ke Jehova-Jire, O ka hlahisa metsi holimo mono. Molimo o boletse! E tla etsahala, leha ho le joalo!” Motho o buile . . .

¹³¹ U nka monna ea bolaoang ke mofetše, seriti sa monna, ke enoa; selemong se tlang ke monna ea phetseng hantle. E etsahetse joang? Ho mo robatsa morao . . . Ke tšoere makholo a mapaki ao. Monna ea batlang a siile bophelo bona, ngaka e tekenile setatemente, “O shoele, o se a shoele lihora ka mor’ a lihora.” ’Me Molimo o ntšitse pono, ’me o a phela joale. Joang? Le se ke la mpotsa. Ha ke tsebe. Empa Molimo o itse, “Le folise bakuli, le tsouse bafu, le leleke matemona.” Ke hantle.

¹³² Nako le nako ha u kula ’me Molimo o tlaheha pholiso, u tswelepele feela—feel a le ngaka ea hau, e re a u boelle ha u folile. O tla u neha . . . Hoo ho tla mo pakela. Haeba a re, “Be, ho felile ka ntho eohle;” e re re, “Ho bokoe Molimo! Ke a u leboha, ngaka, ka litšebeletso tsa hau,” le ho tsoelapele. Le a bona? Ke hantle. Hlokomelang.

¹³³ Joale Nohe, o itse, “Pula e a tla, lefatše lohle, e tla fiela lona bohole batho ba khopo.”

¹³⁴ “Ah, bohlanya! Re theile likereke tsa rona. Molisa oa rona ha a bue letho le joalo. Leqheku leo la monna le fapane hlooho, o ntse a haha areka holimo mono. Le nahana hore motho mang o tla e lumela?”

¹³⁵ Ka tsatsi le leng, Molimo oa re, “Ke utloile litšomo tsa bona ho lekane. Ke itokisitse. Kena!” ’Me liphoofto ke tsena li etla, ka bobeli ka bobeli, papagae e tona le e tšeħali, le serobele se setona le se setħehali, le pōli e tona le e tšeħali, le nku e tona le ts’ehali, le tau, le nkoe, tsoħle tse phefumolohang lefatšeng, tsa kena arekeng.

Nohe a re, “Eo ke pontšo ea lona ea ho qetela!”

¹³⁶ ’Me ha ba ka ba e lumela. “Nyoloha ’me u iphelele le liphoofto tsa hau tse nkhang.”

¹³⁷ E ne e le eo, Nohe a mamela Molimo. Ho sa tsottelehe seo lefatše le se buileng, a utloa Molimo; e ne e le moporofeta. A kena arekeng, ’me Molimo oa koala lemati ka mora hae.

¹³⁸ Joale ha ke nahana, balumeli ba bang ba moeli, ba lula ka mathoko ’me ba mamela molaetsa oa Nohe, ’me ba lula nakoana, le a tseba, ba itse, “Le a tseba ke’ng, monnamoholo eo e ka ba o

ne a nepile. Ha re nyoloheng re emeng haufi. A re, ‘Pula e tla qala e na ha lemati leo le koaloa.’ Molimo oa ’molella hore O tla koala monyako, pula e tla na. Ha re nyoloheng ’me re emeng haufi. ‘Me haeba pula e qala eo na, re tla kokota monyako. Hobane ke monnamoholo ea pelo e mosa, o tla bula monyako.’

¹³⁹ Le a bona, ka nako tse ling le sheba lenqosa sebakeng sa Molaetsa. Molimo oa koala monyako. Ho sa tsotellehe mosa oa Nohe, e ne e le Molimo o neng o koala o bile o bula, sohle seo O se batlang.

¹⁴⁰ “Moena Branham, ho na le monna ea lutseng mona koung. Theoha u mo folise, re tla lumela pholiso ea Khalalelo.” Eo ke liabolosi.

¹⁴¹ Eena ea itseng, mohla ba Mo khurumelitseng ka lesela sefahlehong ’me ba Mo otla hloohong, lekholteng, a re, “Ha U le moporofeta, re bolelle ea U otliloeng joale. Re tla e lumela.” Ha A soasoe le mang kapa mang. “Haeba U mora oa Molimo, fetola majoe ana bohobe. Haeba U le eena!” A ka be a e entse, empa ha A soasoe le mang ka letho. “Ha le U mora oa Molimo, theoha sefapanong.” Tšebeletso ea bolisa e ne e rialo, le a bona. Ha A ka a soasoa le motho mang.

¹⁴² O entse kamoo Ntate a Mo bontšitseng, le letho le sele. Ke seo A se buileng, Santa Johanne 5:19, “Mora o sitoa ho etsa letho ka boEena, haese seo A bonang Ntate a se etsa.” Ke lona bao. Hlokomelang.

“Re tla nyoloha ’me re eme mabapa le areka, ha pula e qala...”

¹⁴³ Ke a kholoa Nohe o itse... O ile a kena mokatong oa pele, a hloella mokatong o latelang (linonyana) ho tloha ho tse hahabang, ho nyolohela ofising e latelang. Ho tloha tokafatsong, ho nyolohela khalaletsong (linonyana), eaba u tloha moo ho kena kolobetsong ea Moea o Halalelang; moo fensetere e neng e le teng, moo leseli le neng le ka kena teng. “Ke nyolohetse sebakeng sa leholimo, ka lula fatše.” Ho re, “Ho lokile, lelapa, lona ba kenang ka mona le ’na, hoseng... Ke morao haholo thapama joale. Joale Molimo o koetse monyako tlase mono. Hoseng, lefifi le tla aparela lefatše lohle. Hoseng, lipula li tla tšoloha ’me areka e tla phaphamala e phalle, ’me Molimo o tla—o tla kokobetsa mang le mang oa baetsalibe bao ba khopo ba latotseng Molaetsa.” Bohle ba ntse ba letile.

¹⁴⁴ Hoseng ho hlahlamang, a tsoha, a sheba kantle, ho hlakile ho khanya. O ne a kene arekeng, ba bakae ba tsebang letsatsi a keneng ka lona? Ka la 17 Motšeanong, mohlang oo Nohe a le lilemo li makholo a tšeletseng. Ka la 17 Motšeanong, Bibele e boletse. ‘Me eitseha a kena, la 17 la feta, letsatsi la chaba le chesa se sa mehleng.

¹⁴⁵ Ekare ke a ba nahana, ba moeling, ba ntse ba re, “Ah! Ke le joetsitse ha letho ho eona! Le ntse le likalika ke’ng holimo mono? Sirohang moqhekanyetsi ea joalo!”

“Be, kea kholoa e ne e lokile.”

¹⁴⁶ Empa, le a bona, o teng mola sehoang lipakeng tsa ho lumela le ho se lumele. ’Me u ka ema lehlakoreng le leng kapa le leng. ’Me ho tla fihla mohla u tla bitsoa khetlo la hau la ho qetela.

¹⁴⁷ Ka hona, letsatsing la bobeli, ebile masoabi a makakang ho Nohe le kereke ea hae, mohla a ba boleletseng hore Molimo o tla felisa lefatše. Empa na le a tseba o lutse nako e kae? Matsatsi a supileng, ho sa etsahale letho. Ho fetisoa tekong!

¹⁴⁸ Eaba ka letsatsi la borobel, lefifi le aparela lefatše lohle, marotholi a sephara a qala a theoha sebakeng, metsi a qala ho tšoloha, ’me liba tsa pshatleha. Literata tsa tlala metsi. Batho ba kokota monyako, empa esitile le Nohe ha a ba utloa. ’Me ea phahama holima leralla le phahameng ka ho fetisisa, ’me tsohle tse kantle ho areka tsa timela.

¹⁴⁹ Molimo o fetisa Nohe tekong, ho bona haeba a ka leka ho hloa a tsoa ka fensetere, kapa ho hong. Hoba A etse tsepiso, Nohe o ile a e emela a lula!

¹⁵⁰ Ke eona! Haeba u tšoere tsepiso, ’me u e tseba e le tsepiso, lula le eona! Abrahama o ne a loketse ho leko. Lula le tsepiso!

¹⁵¹ Joale, ba ile ba fumana pontšo ea bona ea ho qetela. Eaba ’mele oa bona o a fetoloa. ’Me hang Isaaka e monyenyan a fihla temeng, moshanyana ea ratehang oa Mojuda. Ke a kholoa o bololitsoe ka mora matsatsi a robeli. Kamoo ’mè eo e mocha, lilemo tse lekholo... Kamoo Abrahama, lilemong tse lekholo; kapa tšali a le mashome a robong, ’me ton a le lekholo; mohla ba batlang, ba le lilemong tsa bomashome a mabeli, ba ne ba thabile. Mothoana enoa, a khahleha bo!

¹⁵² ’Me le a tseba, Molimo oa re, “Joale ho tsebisa batho ba litsiu tse tlang (Peo ea Abrahama) ho tseba, Peo ea hau ho tseba hobane Ke boloka tsepiso ea Ka mothong mang ea tiisetsang Lentsoe la Ka, Ke tla mo fetisa tekong.”

¹⁵³ Lilemo tsa moshanyana ha li batla li le leshome le metso e mene, ke a kholoa, a le moriri o mangetse le mahloana a matle (Oh, ntate eo le ’mè ba thabile hakakang! U a tseba uena motsoali ngoana oa hau, ngoana ea mong.), Molimo oa nt oo re Abrahama, joale, A ke ke a bolella Sara, hoba Sara e ne e le lefiso le fokolang ho feta, ’me ka hona A re, “Abrahama, ke batla u nke moshanyana enoa eo Ke u neileng eena, eo Ke tlang ho u etsa ntata lichabachaba ka eena, ’me Ke batla hore u mo nyollele thabeng eo Ke tla u bontša eona bosius bona ponong, ’me u mo hlabe teng.” Ho senya eona feela tšepo e beng e le teng ho eena ho ba ntata lichaba, ho Molimo ho boloka Lentsoe la Oona; Molimo oa re, “Ke u etsa ntata lichaba.” Esale a eme lilemo tsena tsohle joale,

ho fihlela a le lilemo tse lekholo, lilemo tse lekholo le leshome le metso e mene. "Me moshanyana ke enoa joale, le bona feela bopaki boo u bo tšoereng bo reng Ke tla boloka Lentsoe la Ka, nyoloha u bo timetse. Ke sa ntse ke tla u etsa ntata lichaba ka ngoana enoa."

¹⁵⁴ "Me Abrahama," ho itsoe, "ha a ka a sisinyeha tšepisong ea Molimo. A tseba hobane o mo amohetse joaloka ea tsoang bafung. Ho tseba, haeba Molimo a tšepisitse joalo, A ka mo tsosa bafung."

¹⁵⁵ 'Me re ntano ba Peo ea Abrahama? 'Me phosonyana e le 'ngoe ea thuto ea bolumeli e ka phatloha ea kena tseleng, ho tuma har'a banna le basali ba bang, u ea ho eona sebakeng sa ho lula le Lentsoe. Ha le soabe! Mokhatlohalo oa mofuta, ntho eo e bolelang ho Molimo? O tla e falatsa *joalo!* [Moena Branham o thanya monoana oa hae—Mohl.] O hole le eona, esale ho le joalo ho tloha ba hlophositse, o mong le o mong oa eona, 'me ho tla ba joalo kamehla. Ha se batho ba leng ka mono ka bomong, empa tsamaiso ea mokhatlo, e khahlano le Molimo. Kereke e 'ngoe le e 'ngoe e hlophiloeng ke 'mè . . . kapa morali oa mokhatlo oa Katolike. Bibele e itsalo, Tšenolo 17, "Sehlola sa khale, le barali ba sona ba liotsoa." Hantle haholo.

¹⁵⁶ Re mo hlomme mona joale holim'a naha ea rona. Ha le soabe lona Mademokrate a khabane a rekileng ka litokelo tsa tsoalo ea lona! Ho lokile, re tla e tlohela, ho fihlela ke khutla. Hlokamelang. Ke siiloe ke nako. Na Kreste oa lona ha a bohlokoaa ho lona ho feta lipolotiki tsa lona? Le lokela ho etsa seo Abraham Lincoln a se boletseng. Ho lokile. Hlokamelang, re tsoela pele.

¹⁵⁷ Joale Molimo oa re, "Nka mothoana eo, mo nyollele tlhōrōng ea thaba."

¹⁵⁸ Joale na le batla ho tseba haeba Abrahama e ne e le mohlankana kapa che? O tsamaile leeto la matsatsi a mararo le ngoana, ka patsi, le mohlanka, le eselete. Joale monna ofe, monna ea tloaelehileng. . . . Ke ne ke hlahloba lithapo tsa motlakase, ke tsamaea ka maoto mehleng eo ke le lepolesa la hlaho; 'me nka tsamaea, habonolo, limaele tse mashotharo ka letsatsi. 'Me maoto a rona ke a petrolo, re e bitsa joalo. Empa monna bao, sepalangoa sa bona e ne e le ka maoto feela, kapa ho kalla eselete. 'Me ke bana ka eselana e lenama; koana re ka e siea ka maoto. 'Me e ne e le enoa, leeto la matsatsi a mararo, a lelatsta hlooho a boneila thaba hole, le joale. A batla a le bohōle ba limaele tse lekholo hole le tsoelopele, motšeо koana ho lehoatata. Joale mamelang, le hlokomele.

¹⁵⁹ Eaba o nka patsi, a e beha mokokotlong oa Isaaka; sefapano, Mora oa Molimo lilemo hamorao. 'Me Isaaka a jara patsi a nyoloha leralla, a tla robatsoa holim'a eona e le sehlabelo. Seriti!

¹⁶⁰ Efela haeba Molimo o e bapisitse ho fihla botsekeng; Mosali oa Lota, u se ke oa hetla morao linthong tsa lefatše. Lipapiso

tseo tsohle le liriti li phethahetse. Le a bona? Hopolang Eva. Hopolang mosali oa Lota. Hopolang Lota ka seqo, uena monna. Hopolang, Adama o ile a inehela ho mosali oa hae; Lota, ka ho tšoana. Elang hloko. Ke mpa ke le bolella feela, joaloka moena. Ke morao ho feta kamoo le nahanang.

¹⁶¹ Hlokamelang Isaaka e monyenyan ha a nyoloha leralla. 'Me a hla a belaela. 'Me a qamaka, 'me a re, "Ntate?"

'Me a re, "Ke 'na enoa, mora oa ka."

¹⁶² A re, "Patsi ke ena. 'Me tsohle ke tsena, ntho eohle, mollo. Empa konyana ea secheso e kae?"

¹⁶³ Mamelang ntate-moholo eo, lentsoe la hae le sa teteme, a re, "Mora oa ka, Molimo o tla Itlhahisetsa sehlabeled." Mora ea mong ho eena a ea hlabong, empa koana pelo eo ea khale e tšepehang e tsebile hoba Molimo o ke ke oa bua leshano.

¹⁶⁴ Eo ke Peo ea Abrahama kajeno! "Ho ka ba joalo joang, Moena Branham?" Molimo o tla Itlhahisetsa! "Ebe O tla khona joang?" Ha ke tsebe. Empa Ke Jehova-Jire!

¹⁶⁵ A nyolohela hlōrōng ea leralla, a bokella majoe. Ho beha patsi holim'a majoe, a e hotetsa ka mollo. Ho re, "Isaaka, mora oa ka, retoloha." A tlamolla thapo thekeng, a mo tlama matsoho le maoto. Isaaka, ka kutlo, joaloka Kreste, ho isa lefung. A mo robatsa holima boloko. Ho nanabela selateng sa hae 'me a ntša thipa ea tonana; a e leotsa makhetlo a 'maloa, ho lelela leholimong.

¹⁶⁶ "A se ke a sisinyeha tšepeisong ea Molimo ka ho se lumele, empa a ipha matla, a tseba hobane o mo fumane joaloka ea tsoang bafung; a kholisehile ka bottlalo hore haeba Molimo a mo laetse, ho e etsa, O ka mo tsosa bafung." Eo ke Abrahama, 'me eo ke Peo ea hae ka mora hae. Efela eo ha e ne e le peo ea tlhaho, Peo ea borena e loketse ho ba eng? Ho se sisinyeha! Seo Molimo o se bolelang, Molimo o tla se etsa. Ho tseba hoo, a khotsoe ka bottlalo; hore seo Molimo o se tšepeisitseng, Molimo o ne o khona ho se phethisa.

¹⁶⁷ Ho leotsa thipa; mahloana a matšo a Isaaka a shebile lehare le leholo le bohale ha le hohla lejoe. Ho nanabela; a lahlela mangetse a moriri oa hae morao ho o pheula sefahlehong, a qethosa seletsoana sa hae. Ho phahama, 'me likeleli li theoha sefahlehong sa hae. Ka ho tseba, 'me ha a ka a sisinyeha tšepeisong ea Molimo! Ho phahamisa letsoho la hae ho totometsa thipa 'metsong oa mora oa hae.

¹⁶⁸ 'Me hoba a etse, lentsoe la Molimo la bitsa, ho tšoara letsoho la hae, ho re, "Abrahama! Abrahama, khutlisa letsoho la hau! Ke tseba joale hoba u a Nthata." O ne a etsang? Ho pakela Peo ea Abrahama, kamora hae. "Khutlisa letsoho la hau, u se ke oa ntša ngoana enoa kotsi! Ke tseba hoba u a Nthata."

¹⁶⁹ 'Me ka eona nako eo, Abrahama a utloa ntho ka mor'a hae. 'Me a talima, 'me pheleu e le eo (ke nku e tona) e ne e tšoasitsoe ka linaka leholeng le lihlahleng. 'Me Abrahama a tloha a nka pheleu 'me a e hlaba, sebakeng sa mora oa hae.

¹⁷⁰ Pheleu eo e ne e tsoa kae? O hôle le tsoelopele ka limaele tse lekholo. Khele, libata tse hlaha li ka be li e bolaile holane e ne e le motše mono. Ehlide, ke e—ke phoofofolo ea lapeng. E ne e tsoa hokae? 'Me, ntle le moo, ke holimo koana qhooeng ea thaba, joang kapa metsi ha li fumanoe. 'Me Abrahama o thonakile majoe ka mathoko, moo e neng e le teng, ho aha aletare. Ebe e hlahile ka? E ne e se pono; e ile ea fopha mali. Pono ha e fophe mali. Alleluia! Jehova-Jire o ne a Iketselitse sehlabelo!

¹⁷¹ Ha Molimo o nkuoa Lentsoeng la Oona, O ka hlahisa sohle seo O se hlokang. Molimo, Jehova-Jire, e sa ntse e le Jehova-Jire bosiumg bona. O se a hlahisitse Sehlabelo. O hlahisitse Kereke. O hlahisitse Lenqosa, Moea o Halalelang. O teng mona joale, Jehova-Jire. Morena o Itlhahiselitse Bibele, Moea, Kereke, Molaetsa, Lenqosa. 'Me hora e tlie joale mona ea hore Kereke e hloibiloe le ho isoa hae. Jehova-Jire o tla hlahisa mokhoa oa ho ntša Kereke eo lefatšeng lena, ka ho fetola mebele ena e fokolang ea rona, le ho e nyollela Khanyeng. Jehova-Jire! E tla etsahala joang mehleng ea joale eo re phelang ho eona, lintho tsee li tla hlaha joang?

¹⁷² Billy, mora oa ka, hohle moo a leng teng, le 'na, re sa tsoa khutla India haufinyane tjena. Eaba ke nka pampiri... Ha ke theoha sekepeng, keha likete li eme mono li tšoere masihhla a likhare. Eitseha re fihla Taj Motel, mono keha ba behile pampiri, ea Senyesemane. 'Me ka bona seratsoana se seholo ho eona, ho thoe, "E tšoanetse e be e le sesupo sa hore thothomelo ea lefatše e fetile." Bothata e ne e le bofe? Be, matsatsi a ka ba mararo kapa a mane pele ho tšisinyeho e kholo ea lefatše eo le balileng ka eona, linonyana tsohle tse neng li phela mafikeng... .

¹⁷³ India, ha ba na difense tse kang tsa rona California, United States. Ba haha marako ka majoe ao ba a thonakang. 'Me linonyana li haha sehlaha sa tsona o ona. Ba haha litora tse khôlô, 'me linonyana li haha lihlaha tsa tsona teng. 'Me linonyana tsohle, matsatsi a 'maloa pele ho tšisinyetsho ea lefatše, tsa fofa li tloha marakong. 'Me nakong ea mantsiboea kapa... Har'a motše share, ha ho chesa, linku le likhomo li ne li ema moriting oa lerako le tora, ho tšabela letsatsi le chesang.

¹⁷⁴ Empa matsatsi a mabeli, likhomo le linku ha li a ka tsa khutlela lerakong. Tsa ema kantle thoteng tsa itšetleha e 'ngoe ka e 'ngoe, ho tšelisana. Eaba ho fihla thothomelo ea lefatše, ea heletsa marako ao. 'Me linonyana tsa qala tsa khutla, makhomoa a khutla thoteng. E ne e le eng? Oona Modimo o neng o ka biletsha linku le makhomoa, le linonyana, ho kena arekeng, oa supa e le Oona Molimo kajeno o ka biletsha liphoofolo tsa Oona hole.

¹⁷⁵ 'Me efela ha O khona ho tataisa phoofolo ka bohlale ba tlhaho, hakakang Kereke ea Molimo e loketse ho sutha marakong ana a matonana a entsoeng ke batho le lithuto tsa likereke. Babilona e tla heleha, ka le leng la matsatsi ana. Jehova-Jire o Iketselitse Nqalo ea lona ea Phomolo. Fofelang hole le litora tsa lefatše!

¹⁷⁶ Fofelang hole le mabenyanane a Hollywood! Likereke li ntse li leka ho ipapisa le bona, phatsimo. Evangeli ha e phatsime. Hollywood e a phatsima; Evangeli e a khanya. Hollywood e phatsima ka mabenyanane. Kereke e kholo e phatsima ka thuto. 'Me Kereke ea Molimo o phelang e khanya ka boikokobetsa le mosa, le Moea o Halalelang. Phapang e ngata lipakeng tsa ho khanya le ho phatsima.

¹⁷⁷ O teng mona joale. Jehova-Jire o Itlhahiselitse. "Molimo o ka tsosetsa Abrahama bana le ka majoe ana." Haeba mekhatlo e sa Le amohele, Molimo o ka khokolotsa bana ba Oona literateng, liotsoa ho tsoa matlung a phapohelo. O ka hlahisa sohle seo O se batlang. Empa haeba Molimo o hlahisitse Molaetsa, motho o teng kae-kae ho O amohela. Jehova-Jire! Morena o tla Itlhahisetsetsa Molaetsa. Morena o tla Itlhahisetsetsa Moromuo. Morena o tla Itlhahisetsetsa, ka mokhoa oa Hae ka Seqo, lipontšo ho Kereke; e seng ho ingolisa, ho ngola mabitso a lona libükeng.

¹⁷⁸ Re utloa khafetsa kajeno ka liqeto, liqeto tse ngata. Ho thusa'ng ho bokella majoe haeba u se na 'metli oa majoe mono ho a betla le ho a betla ho fetoloa bara le barali ba Molimo? Ho thusa'ng ho ba le mekhatlohaliea malumeli e ahiloeng ka likete, ho se motho mono ka Sabole ea Molimo e bohale e leolitsoeng ka nqa tse peli ho ba betla ho fetoloa bana ba sebele ba Molimo? Molemo e ka ba ho ba tlohela moo ba leng teng. Amen. Molimo (ha se Methodise, ha se joaloka Baptise, Katolike), Molimo o Itlhahiselitse Thipa ho betla bana ba Molimo, bara ba Molimo. Amen. *Jehova-Jire*, "Morena o tla Itlhahisetsetsa." 'Me O e entse! Lumelang ho Oona, 'me le phele.

Ha re inamiseng lihlooho tsa rōna nakoana feela.

¹⁷⁹ Molimo o mohau, Molimo o phelang kamehla le mehla, u re hauhele joale, 'me u re fe mohau oa Hau. Ha re na tokelo, Ntate, ea eng le eng eo U ka re etsetsang eona. Empa ha re ipolele hoba re na le tokelo, empa re mamela feela pitso e tsoang ho Molimo. Re a rapela, Ntate, hore U tle u re betle bosiusing bona ho ba majoe a tla lekana Tempele ea Molimo, bakeng sa ho Tla ho hoholo ha Morena Jesu Tempeleng ea Hae. Aba sena sena, Ntate. Rona baetsalibe re tšoarele likhaello tsa rona. Re senolele Lentsoe la Hau. Re bontše Tsela ho tsamaea teng. Re rute, Ntate Molimo. Re ke E amohele. 'Me ha e le khahlano le Lentsoe, re a tseba hore ke mosuoe ea phoso. Moea o Halalelang ke moruti oa rona. O ngotse Lentsoe, 'me A ke ke ruta letho haese Lentsoe. 'Me re rapela hore

A bonahatse ho rona bosiung bona, ka pelong tsa rona. Aba sena, Molimo.

¹⁸⁰ Joale re sa inamisitse lihloho tsa rona, mahlo a rona a koetsoe. Mohau oa Molimo o lule holim'a rona, ke thapelo ea ka e ikokobelitseng le e tiileng. Lumelang feela joale. Le se belaеe.

¹⁸¹ Na ba teng ka mohahong, etsoe ke ba tseba ba le teng, banna le basali ba sa Mo tsebeng, ba eso amohele Schlabelo sa Hae se hlahisitsoeng le ka mohla, Morena Jesu, e le Mopholosi oa hau? Ha le Mo tsebe? Ka hlalefo u ka hopola joalo. Empa motho a ke ke a bona Molimo ho fihlela a tsoetsoe labobeli. *Bona* ha ho bolele . . . Ha u bone ka mahlo; u sheba ka mahlo a hau. *Bona* ke ho "utloisia." U Le sheba hantle, le ho re, "Ha ke e bone," u bolela ho re "ha u e utloisise." U ke ke ua tseba seo re buang ka sona ho fihlela u tsoaloa labobeli. Ha u e-so fumane phihlelo boo? Ka lihloho tsa lona tse inamisitsoeng joale, le mahlo a lona a koetsoe, na u ka phahamisa letsoho la hau, le ho re, "Moena Branham, nkhopole thapelong bosiung bona. Ke a lumela re amohela Molaetsa oa rona oa ho qetela. Letsatsi le phirima ka potlako. 'Me ke bona seo u se boletseng ka Bibeleng hore ke 'nete, hoba ke balile Bibele. Ke a lumela hore ke hora eo re tlamehang ho tla ka eona hona joale. 'Me, bakeng sa ka, joale ke emela Kreste"?

¹⁸² Molimo a u hlohonolofatse. Molimo a u hlohonolofatse, uena. Ke botle. Holimo seotloaneng, matsoho! Phahamisa letsoho la hau feela, ho re, "Ha e le 'na, joaloka ha Joshua a boletse, 'Ha e le 'na le ba ntlu ea ka, re tla sebeletsa Morena.'" Ho lokile, motho e mong? Ke shebeletse feela. Molimo a u hlohonolofatse morao mono. Ke bona letsoho la hau. Molimo a u hlohonolofatse holimo mono. Molimo a u hlohonolofatse. O a u bona. Holimo koana seotloaneng, Molimo a u hlohonolofatse holimo mono, monghali; ntho e kholo ka ho fetisia eo u kileng oa e etsa bophelong ba hau. Hantle kahara seotloaneng se bohareng, motho e mong a phahamise letsoho la hae ka mono. Mohlomong ha ke a bona letsoho ka mono, e ka ba . . . Motho e mong seotloaneng se bohareng holimo koana? Phahamisa letsoho la hau, le ho re, "Moena Branham, ha e le 'na, kea . . . Ke batla ho Mo sebeletsa. Ke—ke a tsepahala." Molimo a u hlohonolofatse. Molimo a u hlohonolofatse. Molimo a hlohonolofatse monna e monyenyan. Ka seotloaneng ho le letona, motho a phahamiselitse letsoho la hae holimo mono, le ho re, "Moena Branham, 'na, ha e le 'na, ke a tseba hoo ho lokile. Ke a . . . Ha ke tsebe Molimo, empa ke batla ho Mo tseba. Ke batla ho ba le bonneta. Ke bona nke ke ka hakanya feela. Nke ke ka hlola ke khutla hape."

¹⁸³ "Sefate se oela, moo se sekametseng teng," Lengolo le a bolela. U se ke oa oela nqa e fosahetseng. U ka e lokisa bosiung bona. Hopolang, ha feela Bosafeleng bo lula bo le teng, 'me koana

ha bo eso qale 'me bo ke ke ba fela, empa u fetoha karolo ea bona, u tla sotleha kapa u tla phela ka nyakallo. U tseba joang hore u tla be u phela pele u fihla hae?

U re, "Ke mocha haholo."

¹⁸⁴ Ke sa tsoa fumana molaetsa nakoana e fetileng. Mofumahatsana morao lebatooeng la heso, o sa tsoa kheloha litsela, a qala a tsuba lisakerete. O ne a boleletsoe ka Molimo, empa a se ke a mamela. Lilemo tse leshome-tšeleta, o ne a tsoa...che, lilemo tse leshome-robeli, a sa tsoa tsoa qeta thuto ea sekolo se phahameng. 'Me o ile a bolelloa, a 'na a leka ho etsa hantle. Empa a ineanya le mokhupi o fosahetseng, a bolaoa ke lehalima hang.

¹⁸⁵ Haufinyane tjena, monna oa bammala Shreveport u ile a ema 'me a re, "Ha ho ntho e kang Molimo" Ho nyefola feela, ho re, "Ha se letho haese sehlopha sa bahalaleli ba thetethehang." Lehalima la mo bolaea. Ba mo isa lebitleng. Eare ba ntse ba epela monna eo, ha nyoloha lerunyana, 'me lehalima la otla lekese 'me la mo phatlola le mo ntša ka lekeseng.

¹⁸⁶ Jehova Molimo o a halefa. Ke a tseba hore Ke Molimo o lokileng, empa Ke Molimo oa kahlolo, hape. O sa ntse a shebile, O a tseba.

¹⁸⁷ Haeba u se na Molimo, phahamisa letsoho la hau, ho re, "Nkhopole, Moena Branham, u sa rapela." Molimo a u hlohonolofatse, mofumahali. Molimo a u hlohonolofatse, mora. Ke hantle, qhoba hantle. Molimo a u hlohonolofatse. Ke hantle, mohlankana. Molimo a u hlohonolofatse morao mono. U kope Molimo o Matlaohle.

¹⁸⁸ Ntata rona ea Leholimong, joale U ba bone. U a tseba ho phahame matsoho a mashopeli kapa a mashotharo, ba reng ba U batla joaloka Mopholosi oa bona. Molimo, aba sena hona joale. Ke nehela Lentsoe lena. U boletse, ka seqo sa Hau, "Ea utloang Lentsoe la Ka." Ke entse sohle seo nka se khonang ka Lona, Morena. "Ea utloang Mantsoe a Ka 'me a lumela ho Ea Nthomileng, u na le Bophelo Bosafeleng, 'me a ke ke a tla kahlolong, o mpa a tlohile lefung ho kena Bophelong." Ke ntho e babatsehang hakakang, ho nahana hoo! Haeba e le lipelo tse tšepehang ka mora matsoho ao, li ne li hlile li tiile, ntho e sa tsoa etsahala. Joale U itse, "Ea tla mpolela pela batho, le 'na Ke tla mo paka pel'a Ntate oa Ka le Mangeloi a halalelang." Ba tsebise hore U teng mona, Morena. Ke rapela hore U tle u e abe. Re utloe. Re bahlanka ba Hau, Morena. Ka Lebitso la Jesu.

¹⁸⁹ Ho lokile, phahamisang hlooho ea lona. Le a lumela hore Ke Jehova-Jire? [Phutheho e re, "Amen."—Mohl.] Na le lumela re phela matsatsing a joaloka matsatsing a Lota? ["Amen."] Matsatsing a Nohe? ["Amen."] Na le hopola Molaetsa oa ho qetela?

¹⁹⁰ Na u teng motho e leng khetlo la bona la pele? Phahamisa letsoho la hau. Ba bangata! Kea kholoa Moena Borders u le hlaloselitse. Le utloile ka kopano pele, se etsahalang. Phahamisang matsoho a lona, haeba le entse; haeba le eso e bone le ka mohla, le e utloile feela. Ho lokile. Joale ha ke tsebe batho ba mona.

¹⁹¹ Ba bang ba lona batho ba nang le mathata, rapelang Molimo, 'me le re, "Molimo, nkauhele, ke a kula. Moena Branham ha a ntsebe. Empa ke a utloa U Moprista e Moholo ea ka angoang ke maikutlo a mefokolo ea rōna." Ba tsebang seo ba bakae? [Phutheho e re, "Amen."—Mohl.] "'Me esale Eena maobane, kajeno, le kamehla." Le tseba seo? ["Amen."] Be, joale, haeba E le Moprista ea Phahameng ea tšoanang, ebe O ne a tla itšoara joang ha u ka Mo ama? Ka moo A entseng mohla mosali oa phallo ea mali a neng a Mo ama. O ile a retoleha a 'molella seo phallo ea hae ea mali e beng e le sona, le ho 'molella hobane tumelo ea hae e mo pholositse. Na ho joalo? Esale Eena Eo bosiung bona, ha u ka Mo lumela kamoo A neng a le kateng mohlang oo. Na le Mo lumela ka mokhoa oo?

¹⁹² Joale le shebe nqa ena, ho 'na. Joaloka ha Petrose le Johanne ba boletse monyako o Lokileng, "Re talime." E ne e se ho "sheba ho bona" bakeng ntho efe, empa, "ho sheba seo ba neng ba se bua."

¹⁹³ Ha re qaleng ka *mona* kae-kae. Shebang ka mona, 'me le lumele ka pelo ea lona eohle. Le ho re, "Morena Jesu, ke a U lumela, 'me ke batla ho ama seaparo sa Hau. U bue le Moena Branham, ho mo tsebisa bothata ba ka. Ke tla U lumela ha U ka e etsa." Na u ka e etsa?

¹⁹⁴ Joale ntho e sebete ke ena. Nka iteta sefuba ho etsa ntho e joalo joang? Ke tla be ke itšiteloa ho etsa phephetso e joalo. Nkile ka e phephetsa pontšeng ea batho ba halofo ea milione, hang, ke sa bue le puo ea bona. Empa ha A ka a ntšoabisa. Hobaneng? O e tšepisitse! Ana ke matsatsi a qetelo, 'me O tšepisitse sena, 'me ke sena.

¹⁹⁵ Ke a tseba, metsoalle, le hlokofalitsoe ke lintho tse ngata. La hlaheloa ke boetsisi bo bongata ba nama. Empa ha nke ke le boelle taba e le 'ngoe, ha se molemong oa ka, empa e le molemong oa lona. Ba fumana seo kamehla. Empa Molimo ha o boloke ba babeli lefatšeng ka nako e le 'ngoe, le ka mohla. Empa hopolang feela, ho fumanoa boiketsiso bo bongata, empa Molimo oa sebele o teng. Moea o Halalelang oa sebele o teng. Molaetsa oa 'nete oa Molimo o teng, 'me ke hore Jesu Kreste u shoetse baetsalibe, ho tsoha bafung, le ho khutla hape ka Botho ba Moea o Halalelang, ho etsa mosebetsi o tšoanang kahar'a Kereke le oo a O entseng mehleng ea Hae mona.

¹⁹⁶ Joale, na Lentsoe la Molimo ha le bolele sena? Ho Baheberu, Le boletse, khaolo ea 4, Bibele e boletse ho re, "Lentsoe la

Molimo le bohale, le fetisa sabole, e leolitsoeng ka nqa tse peli,” le hlabha ha e tla le ha e ea, “le ho fihla mokong oa lesapo, le Mosenoli oa mehopolo le merero ea pelo.” Na ho joalo?

¹⁹⁷ Ka lona lebaka leo Jesu o ne a ka ema pel'a letšoеле le ho ba bolella. Bafarisi bao ba itse, “Ke Belsebule,” Jesu a retoloha, ba ne ba sa bue ba phahamisitse lentsoe, empa A ba bolella. Ka lona lebaka leo O ne a ka bolella mosali ka phallo ea hae ea mali, ho bolella hoba mosali hore o ne a na le banna, ’me hoba a rialo, eaba O re, “Khele, eo ke pontšo ea Messia!”

¹⁹⁸ Joale na le bona ho khutla, ho hlahha ha Messia har'a batho. Ke Moea o Halalelang o hllophisang Kereke.

¹⁹⁹ Ke batla hore le retolose hlooho tsa lona. Na le bona mosali e monyenyanе ea fihang mono, a boela a phahama, ea lutseng hantle tlase mona? Na le bona Leseli leo holim'a hae? O jeoa ke khatello e holimo ea mali. Ke hantle. O apere mosesе o boputsoa ba leholimo, oa batla a roetse ligalase sefahlehong. Motsothaaneng oa ho qetela, kapa e 'meli, esale a apere maikutlo a mohollo a mofuthu haufi le eena. Ke hantle. Joale khatello ea hau e holimo ea mali, esale e u tšoenya hampe haholo, e u tlohetse. Na u a e amohela? Phahamisa letsoho la hau haeba u etsa joalo.

²⁰⁰ O amme eng? Moprista e Moholo. Joale e-eang, le botse mofumahali. Ha ke eso 'mone bophelong ba ka. Ha ke tsebe letho ka mosali; empa, hoo ke 'nete. Ke ne ke shebile Leseli leo ha Le ntse le haola har'a letšoèle lena, la tšeletla hantle 'me la khutla, Leseli le khanyang.

²⁰¹ Le a lumela na? Ramatiki, bothata ba senya, litšitiso, dinerefe, bofokoli. Ke hantle. Ha u tsoe mona. Tulonyana e bitsoang West Point. Ke hantle. Na u a lumela Molimo o ka mpolella hore u mang? Mofn. Hardwick. Ke hantle. Haeba ho le joalo, ema ka maoto a hau. E u tlohetse. Jesu Kreste o a u folisa.

²⁰² Na le a lumela? [Phutheho e re, “E.”—Mohl.] Batho ba e shebeletse, morao. Mofumahali ke enoa o lutse hantle mona. Shebang, Leseli leo le ntse le sa ntse le lopaletse holim'a hae. Na ha le bone Seo? Ke lena moo Le leng teng. Shebang.

²⁰³ Ke Leo, le na le monna eo ea lutseng mono hantle a nchebile. Athritisi. Ho lumela ka pelo ea hae eohle, Molimo o tla u folisa, monghali, le uena. Re basele e mong ho e mong, empa e seng ho Molimo.

²⁰⁴ Mofumahali enoa hantle morao mona, o jeoa ke hlooho. Molimo, se mo lumelle ho e fosa. Oho Molimo, ka kopo hle. Mofumatsana Morton, lumela ho Morena Jesu Kreste. O u folisitse hlooho eo. Le a bona, ha A mo lesa ho feta. Ke batla ho le botsa taba. Bosiung ba maobane ha ke bua le motho e mong ka mohahong mabapi le hlooho ea bona, o ile a arubetsoa ke maikutlo a hlollang haholo, ’me u ne u ipotsa haeba e ne le uena, kapa che. Na ha ho joalo? Phahamisa letsoho la hau. Ke ntse ke

sa bale kelello ea hau, empa ke u joetsa seo esale u se nahana. Ke hantle. Kajeno O ne a batlile ho etsa bonneta ba hore ke uena. E tla u lesa joale, tumelo ea hau e u pholositse. Alleluia.

²⁰⁵ Shebang mofumahali enoa ea lutseng mona, a apere mose o sekoche. Na u tšoere setlankana sa thapelo, mofumahali? Lekola sa hau. Na u lumela hore ho phatloha ho tla u lesa, u tla fola? U etsa joalo? Phahamisa letsoho la hau haeba e le bothata ba hau boo. Ho lokile. Lumela ka pelo ea hau eohle 'me u fole. Na u bona se tlang ho 'na?

²⁰⁶ Mofumahali hantle ka mora hae, o ne a phahamisitse letsoho, ka nthoana . . . che, oa bobeli morao mono, ea apereng mosana o kang o motala, o tšoeroe ke lefu la pelo. E. U a lumela Molimo o tla u folisa? Ho lokile, bo hle. O tla e etsa haeba u ka e lumela.

²⁰⁷ Mofumahali, oa bobeli ho tloha ho uena, Mof. Dillman mono. Ha u lumela hore Molimo o tla u folisa bothateng boo ba mala. Mof. Dillman, lumela, 'me u tla fumana mala a hau. Ke mala a linerefe. A u hlophile nako e telele, haholo-holo ho tloha ka menophose. U hlophuoe ke mathata a mangata, empa tsohle li felile joale. Haeba lintho tseo e le 'nete, tsokoletsa batho letsoho la hau, ba tle ba bone. Haeba ke le osele ho uena, se phetse ho tsokotsa letsoho la hau. Jesu Kreste o a u folisa.

²⁰⁸ Le a lumela na? [Phutheho e re, "Amen."—Mohl.] Ke eng? Jehovah-Jire, Morena o Itlhahisetsa Sehlabeled! Hona joale mokhupi 'ohle o batla o le lerootho ho 'na. Jehovah-Jire o hlahiselitse e mong le e mong oa lona Sehlabeled. Le a e lumela?

²⁰⁹ Joale lona mona ba phahamisitseng letsoho la lona, nyolohelang koano 'me le eme mona motsotso feela. Na le tla e etsa? Jehovah-Jire o hlahisitse Sehlabeled. U phahamisitse letsoho la hau, hore u e lumetse. U bone mona, 'me u a tseba. Hase ntho e ka etsoang . . . Ke Ntho e itseng! Shebang batho bana, ho bitsitsoe ba bakae. Ha ke tsebe joale. Ekaba ba supileng, robeli kapa leshome, ebang e ne e le eng, e bitsitsoeng. E ka lula e tsoelapele feela. Empa ere ke sa na le matla, ke batla hore le tle, le amohele Kreste e le Mopholosi oa lona. Na u tla ema joale 'me u tle, re sa bina, "Ke a tla, Morena, ke tla ho Uena joale"? Na u ka ema joale le ho nyolohela koano, uena ea phahamisitseng letsoho nakoana e fetileng? 'Me le eme le teetse aletare mona, le supe hobane ha le lihlong ka Kreste. Le ka pel'a Sefahleho sa Hae. Tloong joale, le khollise batho hore le ne le hlile le tiile ka eona, hore u batla ho hopoloa ke Molimo, 'me u Mo amohetse e le Mopholosi oa hau. Nyolohang joale, re sa ema bohole 'me re bina.

Ke a tla, Morena!

Ke tla ho Uena joale!

Ntlhatsoe, ntlhoeukise Maling

A phallang a tsoa Kalvari.

²¹⁰ Tsoang joale, theohelang hantle mona. Re tlil'o rapela. U ke ke oa hlola u eba haufi le Eena ho feta ha u tloha.

Ke tla ho Uena joale!
Ntlhatsoe, ntlhoekise . . .

²¹¹ Theohang le tssoe seotlong. Ke hantle. Theohang hantle, le eme hantle mona. Ebang . . . Joale, O itse, “Ea tla Mpolela pel’ a batho, le ’Na ke tla ’molela pel’ a Ntate oa Ka. Empa ekareha le le lihlong ka ’Na, le ’Na ke tla hlajoa ke lihlong ka lona,” hopolang, Bibele, ho qala ho Genese ho isa ho Tšenolo. Tloong joale, ba bacha le ba baholo. Na le tla tla? Setho sa kereke, kapa che, tloong joale. Na u tla tla etsa? Amohelang Kreste le sa le ka pel’ a Sefahleho sa Hae.

Ke a tla, Morena!
Ke tla ho Uena joale!
Ntlhatsoe, ntlhoekise Maling
A phallang a tsoa Kalvari.

²¹² Tsoelang pele, le bine. [Moena Branham o binela ka marameng, *Ke Utloa Lentsoe La Hau La Kamohelo*—Mohl.]

²¹³ Mamelang. Na le lumela hore ke moporofeta oa Hae? Ha ke eso ipolele eona pele. Ke lumela ke eme le batho ba utloisisang le ba tsebang seo ke lekang ho le tlisetsa sona. Batho ba teng ka mona ba ipolelang Bokreste, ba loketse ho ba *mona* hantle. Tloong, na le ke ke la etsa joalo? E reng ke le botse, le tla khona joang le ka mohla? Ha le sa tla fuoa pontšo e ’ngoe. Ena ke Eona. HO RIALO MORENA. Na moprofeta oa Molimo a ka bua polelo eo haeba e ne e se ’nete? Le ntse le amohela pontšo ea lona e kholohali, le pontšo ea lona ea ho qetela, pele Kreste a hlaha. Tloong! Lebaka leo ke buang lintho tsena, ha ke eso bue sena kopanong efe feela, ke utloa eka hantle mona ke monyetla oa hore ntho e etsahale. Lebaka leo ke buang kamoo ke leng kateng. Kea kholoaa hore le a utloisia. Le ke ke la tloha le ea hohle, ho iqalla bokhelohi ba mofuta, ho thoe, “Moena Branham ke molimo,” kapa ntho e kang eo. Le utloisia seo ke buang ka sona. Tloong joale. Tloong. Ha nke ke le qophelleng, ka Lebitso la Kreste. Tloong!

²¹⁴ Uena ea sa tsebeng moo u emeng teng, ha u na bonneta ba eona, e mpa e le bohlalefi feela, kapa maikutloa mofuta; u llile, oa bokolla, kapa oa—oa arubetsoa ke maikutlo a mofuta. U se ke oa leka ho fihla Mono holim’ a ntho eo. Hopolang, ke le bolella ka Lebitso la Morena, hore u lahlehile, u timetse habohloko, athe ha u tsebe. U se ke oa e hakanya feela, motsoalle. Ke mpa ke jala peo feela, le ho hula letlooa. Molimo ke ’ona o atisang. Ha ke tsebe.

²¹⁵ Ha re inamiseng lihloho tsa rona, ho bona haeba A ke ke a mpolella. [Khaitseli o bua ka puo eseles ’me o a toloka—Mohl.] Le utloa seo.

Ke tla ho Uena joale!
Lekolisisa pelo ea hau.
Ntlhatsoe, ntlhoekise ka hara . . .

²¹⁶ Setho sa kereke. Hola ke ne ke eme mono, 'me ke fumane boiphihlelo ba ho ngolisa kerekeng feela....?...Ke ne ke tla titimela mona ka potlako eo nka e khonang.

²¹⁷ Hopolang, Moea o a paka hore re pheletsong. Saense e boletse, "Ke metsotso e meraro pele khitla ea bosiu." Molaetsa le Bibele ho re, "Ke ena, ntho ea ho qetela!" Tsoseletso e a fela. Monyako o a koaloa. U tla be u le kantle, u ntse u kokota, 'me u sa khone ho kena. Tloo!

Molimo a u hlohonolofatse, mofumahatsana. Joale, ana le bone seo?

Ke a tla, Morena!
Ho tla joale...

²¹⁸ Molimo a u hlohonolofatse. Ke hantle, monghali. Ke ona mokhoa, tsoa seotlong hantle u tle. Ho tla ka mela.

²¹⁹ Lentsoe ke lena, bopaki ke bona. Moea ke oo, bopaki ke boo. 'Me ke mona batho baa tla, ho supa hobane re mona nakong ea qetelo.

Ke a tla, Morena!
Ke tla ho Uena joale!
Ntlhatsoe, ntlhoekise Maling
A phalla a tsoa Kalvari.

Ke a tla, Morena!

²²⁰ Ke letile, ke biletса ba bang kahare. "Hase thato hore mang a ka timela; bohole ba tle ba finyelle pakong." "Tloong," ho boletsoe, "ho 'Na."

²²¹ Haeba pelaelo e ne e le teng kelellong ea hau. Le lokela ho ba le bonnette, metsoalle. Tumelo e phethahetse.

...ho tsoa Kalvari.

...Morena!
Ho tla joale ho...

²²² Batho, ba batlang ba le mashome a mahlano ho isa ho mashome a supileng a metso e mehlano ba phuthehile. Joale tloong. Ho lesa bohole ba tlamehang ho tla. Ho mamella nakoana feela joale. Hoba, hosane e tla be e le holim'a pholiso e Halalelang. Moea o Halalelang o buile le 'na, nakoaneng e fetileng, "U se ke oa bitsa mola oo. Memela aletare." Ke tla Mo mamela le ho etsa kamoo A mpolellang. Ke tseba hantle ho feta ho se e etse.

Ke tla ho Uena joale!
Ntlhatsoe, ntlhoekise Maling
A phalang a tsoa Kalvari.

Ka lihloho tsa rona tse inamisitsoeng joale, re sa letile.

²²³ Oho Molimo, lumella Moea o Halalelang ho kena holim'a bana. Ba batlang ho nyolohela kapele aletareng, ba ntse ba

tataisetsa batho joale lehlohonolong. 'Me—'me Morena Molimo a abe seo. Moea oa Molimo, o a bua.

²²⁴ Kenang, kenang. Atamelang joale, e mong le e mong. "Ho moea, o tubiloeng ke sebe, mohau o teng ho Morena." Tloong joale. "Kenang ka tlas'a leqhubu le hloekisang, ba lahla likoli tsohle tsa molato. Se teng Seliba se tletseng Mali, a montsoeng metsong ea Emmanuel." Ka hlompho.

²²⁵ Na le utloa khotso eo e aparetsg kopano hona joale? Ke eng? Ke lefu, lefu ho baetsalibe. Joale lona basebeletsi le ba teele hare hona joale. Ke lefu, batho bana baa shoa. Libibele li tsoile, ba ntse ba hhalosa. Lefu le teetse aletare hare, 'me Bophelo bo bocha bo tla hlahlama lefu.

Se teng Seliba sa Mali,
A montsoeng . . .

Oh, kamoo u tlang ho batla ho utloa seo tsatsi le leng, mohla mothapo oa hau o khaotsang ho thanya!

'Me ba'libe ba inoang leqhubung leo,
Ba lahla likoli tsohle tsa molato.
Lahla likoli tsohle tsa molato,

Ke eona, mohlankana. Ho bokoe pelo ea hau. Ke sona seo A neng a se emetse.

'Me ba'libe ba inoang leqhubung leo,
Ba lahla likoli tsohle tsa molato.

²²⁶ Joale Bakreste ba rupeletsoeng, ba nyolohe re sa bina temana e latelang. "Lesholu le shoang la thabela ho bona Seliba seo tsatsing la lona; teng 'na, leha ke le soto joaloka eena, ke hlatsoe libe tsohle tsa ka." Barupelli joale ba nyolohe ba atamele. Lona ba se nang kolobetso ea Moea o Halalelang, nyolohang le atamele joale. Ha le tsebe seo Molimo o ka se etsang joale motsotsong. Nyolohang joale, re sa bina temana e latelang joale.

Lesholu le shoang la thaba . . . (Lentsoe le
bonahatsoang.)
Seliba mehleng ea hae;

Oh, ho itoketse, tsoang le tle joale. Tloong Metsi a sa ntse a fuluhuoe.

. . . 'na, ea soto joaloka eena,
Hlatsoa libe tsohle tsa ka.
Hlatsoa libe tsohle tsa ka,
Ho hlatsoa libe tsohle tsa ka;

²²⁷ Ke eona, basebeletsi. Kenang hantle. Bohle bao le hate le kenele joale phuluho ea Metsi. Tloong le nyolohe hantle.

. . . ea soto joaloka eena,
Hlatsoa libe tsohle tsa ka.

²²⁸ Joale lona ba batlang ho rapela, nyolohang le atamele joale 'me le itokise. Re tla lumela hore Molimo o tla etsa, ho ela sena

hloko. O tlameha joalo! Oona Molimo o ka lemohang mohopolo oa pelo! Hopolang, Jesu o entse hoo hang feela motseng. Empa O itse, "Le tla etsa tse ngata, ho tsena." Le a bona, ho pakiloe hoba Lengolo la Oona le lokile! Kenang joale. Ha re rapelleng batho bana ba leng mona joale. Motho e mong le e mong ea tsebang ho rapela. Bakreste ba tsoetsoeng labobeli ka mohahong ba bakae? Phahamisa letsoho la hau. Joale e mong le e mong re phahamise matsoho a rona le ho leboha ka batho bana.

²²⁹ Ntata rona ea Lehelimong, re U nyehela teboho ka baka la batho bana. Ke ba Hau. Baa tla, ho ipolela. Ba tlela ho ichoella bobona le sebeng. Ba khutlela morao, e le libopuaa tse ncha ho Kreste.

²³⁰ Satane, u hlotsoe ntoeng! Molimo ke Jehova-Jire! Morena o hlahisitse Sehlabelo, ho hlahisa batho, ho hlahisa memo ea aletare, ho hlahisa Molaetsa, ho hlahisa mohau. 'Me Satane o hlotsoe ke ntoa, ka Lebitso la Jesu Kreste o hlotsoe ke ntoa! 

JEHOVA-JIRE ³ SST62-0707
(Jehovah-Jireh ³)
LETOTO LA JEHOVA-JIRE

Molaetsa wona, ka Moena William Marrion Branham, o rerilwe sethatong ka Senyesemane Moqebelo mantsiboya, Phupu ⁷, 1962, mane Municipal Auditorium, Grass Valley, California, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org